

2013-mi ilassutitut aningaasaliissutitut inatsisissatut siunnersuut

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

inatsisissatut siunnersuutip aappassaaneerpeqarnerani saqqummiunneqartoq

Aningaasaqarnermut Akileraartarnermullu Ataatsimiititaliap ilaasortai ukuupput:

Inatsisartunut ilaasortaq Jens Imanuelsen, Siumut, siulittaasoq

Inatsisartunut ilaasortaq Gerhardt Petersen, Atassut, siulittaasup tullia

Inatsisartunut ilaasortaq Hans Aronsen, Inuit Ataqatigiit

Inatsisartunut ilaasortaq Per Berthelsen, Siumut

Inatsisartunut ilaasortaq Evelyn Frederiksen, Siumut

Inatsisartunut ilaasortaq Kuupik V. Kleist, Inuit Ataqatigiit

Inatsisartunut ilaasortaq Naaja Nathanielsen, Inuit Ataqatigiit

Imarisaanut nalunaarsuut:

1.	<i>Aallaqqaasiut.....</i>	5
2.	<i>Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit.....</i>	7
2.1	<i>Aningaasaleeriaatsit.....</i>	8
2.2	<i>Aningaasaliissuteqartarnermi tunngaviit</i>	9
3.	<i>Aningaasaliissutit pillugit missingersuusiornermut inatsimmi aalajangersakkat.....</i>	9
4.	<i>Ilassutitut aningaasaliissutinut inatsit.....</i>	9
4.1	<i>Aningaasaliissutit iliuutsillu oqaasertaliussatigut aalajangersakkanik tunngavillit.....</i>	9
4.2	<i>Ilassutitut aningaasaliissutinut inatsisissatut siunnersuummik saqqummiussineq</i>	10
4.3	<i>Sulianik Inatsisartuni suliassanngorlugit innersuussisarnerit.....</i>	10
4.4	<i>Aningaasaliissutit inatsisitigut pisussaaffigisat isertitassatullu aningaasaliissutit.....</i>	10
4.5	<i>Aningaasaleeriaatsit allannguuteqartinneqarnerminni Aningaasaqarnermut Akileraartarnermullu Ataatsimiititaliamit akuersissutigineqartut.....</i>	11
4.6	<i>Maleruagassanik erseqqinnerusunik aalajangersaanissamut tunngavissat.....</i>	11
4.7	<i>Aningaasaliissutinik allannguinnissamik qinnuteqaateqarnissamut piumasaaqatit.....</i>	12
4.8	<i>Ilassutitut aningaasaliissutinut inatsisip imarisai.....</i>	14
4.9	<i>Aningaasartuutunik isertitanillu nakkutilliineq.....</i>	14
4.10	<i>Sanaartornermut Iluarsaanermullu Aningaasaateqarfik kiisalu sanaartorneq pillugu ukiumoortumik nassuiaat.....</i>	15
5.	<i>Naalakkersuisut 2013-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat.....</i>	16
6.	<i>2013-mi aningaasanut inatsit aamma 2013-mi ilassutitut aningaasaliissutinut inatsisissatut siunnersuut – kisitsisit pingaarnerit aningaasaleeriaatsinullu agguataarinerit.....</i>	18
6.1	<i>Kisitsisit pingaarnerit aningaasanngorlugit.....</i>	18
6.2	<i>Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut.....</i>	19
6.2.1	<i>Naalakkersuisut oqaasertaliussamut innersuussillutik akuersissutigisaat.....</i>	19
6.2.2	<i>Aningaasaqarnermut Akileraartarnermullu Ataatsimiititaliamit akuersissutigineqartut</i>	20
6.2.3	<i>Inatsisartut Suleriaaseq pillugu Ataatsimiititaliaannit akuersissutigineqartut (suliassaqarfik 01).....</i>	20
7.	<i>Oqaasertaliussanik allannguinerit (inatsisissatut siunnersuummi § 2).....</i>	20
8.	<i>Sillimmatinut kontonit 20.11.50-imit aamma 20.11.52-imit atugassiissutiginninnerit</i>	21
9.	<i>Naalakkersuisut nuussinerinut Aningaasaqarnermut Akileraartarnermullu Ataatsimiititaliap oqaaseqaatai.....</i>	22

9.1	<i>Ataatsimut isigalugu</i>	22
9.2	<i>Aalajangersimasunut oqaaseqaatit</i>	22
9.2.1	Sulisorisat pillugit paasisutissat	22
9.2.2	Naalakkersuisut kingumoortumik atuutilersumik nuussinissanik akuersissutiginninnerat	23
9.3	<i>Naalakkersuisut aningaasaliissutininik nuussineranni inatsisitigut tunngavissat</i>	24
9.3.1	<i>Naalakkersuisut ulloq 31. januar 2013-imi nuussinerat</i>	24
10.	<i>Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat</i>	26
10.1	<i>Nalinginnaasumik oqaaseqaatit</i>	26
10.1.1	Sillimaffiginnissinnaasimannginnissamik inatsimmi piumasagaat	27
11.	<i>2013-mi aningaasaliissuteqarnissamik suliaasanut ataasiakkaanut oqaaseqaatit</i>	27
11.1	Kommunini qinequsaarnernut tapiissuteqarnissamik qinnuteqaatit marluk (13-619 aamma 13-639)	27
11.2	Dundasimi avatangiisit ajoquserneqarnissaat pinngitsoortinniarlugu iliuuseqarnissaq pillugu allaffissornikkut kukkusimanermik iluarsineq (13-620).....	29
11.3	KNR-ip illutaata oqoqarnera (13-621, 13-634 aamma 13-643).....	30
11.4	Royal Greenland A/S-imut sullissinissamik isumaqatigiissutit (13-623, 13-638 aamma 13-652)	31
11.5	Kontomi pingaarnermi 50.01.18-imi, tunisassiorfinni ingerlatsinerneq isumaqatigiissutinut tunngasumi, aningaasaliissutinut tunngavigineqartut allannortinneqarneri (13-624).....	32
11.6	2013-imi akuersissutinut atuisut akiliutaannik atorunnaarsitsineq (13-625 aamma 13-633).....	33
11.7	Inatsisilerinerneq tunngasunik allaffissornerup nukittorsarneqarnera (13-627).....	35
11.8	Nanortalimmi atuartut angerlarsimaffianni kantiinamut atugassannortitsineq (103-632).....	36
11.9	PAT-imut aningaasaliissutinut napparsimasut qarasaasiaq atorlugu nalunaarsorneqartalernissaannik suliniummumut missingersuutinut sunniuteqanngitsumik nuussineq (13-640).....	37
11.10	Nuna tamakkerlugu innarluutilinnut piginnaanngorsarfik nutaaq (13-642)	37
11.11	Konto pingaarnermut 10.13.11-mut, Aktiaateqarluni ingerlatseqatigiiffinnut aningaasannorlugit aningaasartuutinut tunngasumut, ilassutitut aningaasaliissuteqarnissaq (13-644)	38
11.12	Knud Rasmussenip Højskoliata Sisimiuni illuutaasa Namminersorlutik Oqartussanut tunniunneqarnissaat aammalu højskolip akiitsuisa nalikilliliivigineqarnissaat (13-647) 39	
12.	<i>Aningaasaqarnerneq Ataatsimiititaliap kaammattuutai</i>	41

13. *Aningaasaqarnermut Akileraartarnermullu Ataatsimiititaliap inassuteqaatai* 42

Ilangussat

- Ilangussaq A Aningaasaqarnermut Akileraartarnermullu Ataatsimiititaliap 2013-mi aalajangiiffigisai Naalakkersuisunit il.il. akissutinik ilallit. (Suliaq nr. 13-617 – 13-652).
- Ilangussaq B Inatsisartunut qinersinissamik nalunaarutiginnittoqarsimatillugu Aningaasaqarnermut Akileraartarnermullu Ataatsimiititaliap oqartussaaffii pillugit allakkiat.

1. **Aallaqqaasiut**

Inatsisartut 2013-mi ilassutitut aningaasaliissutitut inatsisissaattut siunnersuut Aningaasaqarnermut Naalakkersuisunit Inatsisartut 2014-mi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Akileraartarnermullu Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinninnissaannut isumaliutissiissuteqarluni.

2013-imi ilassutitut aningaasaliissutitut inatsit pillugu isumaliutissiissut una 2010-mi ilassutitut aningaasaliissutitut inatsisip (UPA 2011/8-p) kingorna ilassutitut aningaasaliissutitut inatsisip pillugit isumaliutissiissutit siullersaraat. Tamatumunnga pissutaavoq 2011-mi 2012-imilu ilassutitut aningaasaliissutitut inatsisip ataatsimiititaliami suliarineqartussatut Inatsisartunit innersuunneqarsimannginnerat. Tunngaviumik isigalugu tamanna ataatsimiititaliamit uggorineqarpoq, tassa ilaatigut nunatta karsiata naatsorsuutai, Sanaartugassanut Iluarsagassanullu Aningaasaateqarfik aammalu missingersuutitut ingerlaavartumik malitseqartitsissutit ilassutitut aningaasaliissutitut inatsit peqatigalugu tassaammata pisortat aningaasaqarnermik aqutsineranni pingaarutilittut inissisimasut. Aningaasaqarneq siumut isiginerinnakkut aqunneqarsinnaanngilaq; paasisaqarnerorusukkaanni kingumut qiviarnissaq aamma pisariaqarpoq.

Tamaalilluni ilassutitut aningaasaliissutitut inatsit – eqqortumik atornerqaruni – ukiuni qaangiuttuni aningaasaqarnikkut iliuuserineqarsimasunik paasinninnissatsinnut iluaqutaasinnaavoq, taamaalilluta paasisimasaqarnerulerlutalu kukkunerit uteqqiattut pinngitsoortissinnaallutigit. Ukiut siuliini aningaasaqarnikkut iliuutsit - sivikitsuinnarmilluunniit- uningavigilaarnissaannut inatsisip periarfissippaatigut. Qanoq eqqortumik iliorpugut? Suullu kukkussutigaaq? Isumaliutiginninnerit taamaattut ajoqutaanngillat – iluaqutaallutilli.

Maleruagassat tungaannit isigalugu eqqaasitsissutigineqassaaq ilassutitut aningaasaliissutitut inatsisip imarimmagit aningaasaliissutitut allannguutit

Inatsisartunit,

Aningaasaqarnermut Akileraartarnermullu Ataatsimiititaliamit aamma

Naalakkersuisunit oqaasertaliussani piginnaatinneqarlutik akuerineqartarmata.

Pingaartumik aningaasaliissutitut allannguutit Naalakkersuisunit akuerineqartut ilassutitut aningaasaliissutitut inatsisikkut Inatsisartunut ilaasortanit tamanillu aatsaat takuneqarsinnaalersarput. Taamaattumik Naalakkersuisut allanngugaat taakku aningaasaqarnikkut annertuumik pingaaruteqarsinnaasut eqqortumik tunngaveqarluni pisimansut nalilissallugu Aningaasaqarnermut Akileraartarnermullu Ataatsimiititaliaq – naggataatigullu Inatsisartut – suliaasaqarput annikinngitsumik.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiissummi matumani Aningaasaqarnermut Akileraartarnermullu Ataatsimiititaliamit paasisutissiissutigineqarput. Aalajangiinerit tamakkerlugit taakkunungalu atatillugu allaqatiginnissutit isumaliutissiissummut ilanngussaq A-tut ilanngunneqarput.

Aalajangiinerit ilaat taakku arlallit aningaasaliissutinik allannguinerit aalajangersimasut kisiisa pinnagit aammali maleruagassanik atuineq, inatsisinik qanoq paasinninnissaq kiisalu aningaasaqarnikkut naalakkersuinikkullu anguniakkat pillugit tunngaviumik

isigineqartariaqartunik pingaarutilinnik aamma imaqarput. Taamaattumillu Aningaasaqarnermut Akileraartarnermullu Ataatsimiititaliamut ilaasortaniinnaanngitsoq aammali Inatsisartunut ilaasortanit tamanit minnerunngitsumillu Naalakkersuisunut ilaasortanit aqutsisoqarfiinillu atuarneqartariaqarlutillu ilisimaneqartariaqarput.

Aningaasaqarnermut Akileraartarnermullu Ataatsimiititaliap suliaata ilaanik pingaarutilimmik taamatut sukumiisumik issuaanikkut isumaliutissiissut una Aningaasaqarnermut Akileraartarnermullu Ataatsimiititaliap 2013-imi ukiumoortumik nalunaarutaatut taaneqarsinnaavoq.

Isumaliutissiissut ima aqqissugaavoq:

Isumaliutissiissutip matuma immikkoortuini 2, 3 aamma 4-mi missingersuutit pillugit inatsimmi aalajangersakkat aammalu ilassutitut aningaasaliissutinut inatsisissatut siunnersuummik saqqummiussisarnermut inatsisitigut tunngaviit ataatsimiititaliamit takussutissiissutigineqarput. Inatsisartunut ilaasortat inuillu aningaasaliissutinut inatsisinik immikkut soqutigisaqartut aalajangersakkanik pineqartunik sukumiinerusumik ilisimasaqariinngitsut immikkoortut taakku atuarnerisigut aningaasanut inatsisip suliarineqartarneranik tamakkiisumik, minnerunngitsumillu ilassutitut aningaasaliissutinut inatsisip tamatumani inissisimaneranik paasinninnissaat ataatsimiititaliamit immikkut kissaatigineqarpoq.

Aningaasanut inatsimmi 2013-mi angusassatut missingersuutigineqartumut sanilliullugu 2013-mi aalajangiinerit aningaasatigut kingunerisaat immikkoortuni 5-6-imi paasissutissiissutigineqarput.

Oqaasertaliussanut aningaasanullu inatsimmi sillimmatinut kontoni 2013-mi allannguinerit immikkoortoq 7, 8 aamma 9-mi misissorneqarlutillu naliliiffigineqarput.

Inatsisissatut siunnersuummi ajornartorsiutit, kukkunerit amigaatillu immikkoortoq 10-mi nassuiaateqarfigineqarput.

Aningaasaliissuteqarnissamik suliassat 2013-mi Aningaasaqarnermut Akileraartarnermullu Ataatsimiititaliamit suliarineqartut tunngaviusutut isigineqartariaqarnerpaat arlallit immikkoortoq 11-mi eqikkaavigineqarput. Ukiut siuliini ajornartorsiutaasimasut isumaliutigineqarsimasullu arlallit inerniliivigineqarput, taamaattumillu immikkoortoq taanna isumaliutissiissuummi pingarnerit ilaattut isigineqartariaqarpoq. Taamaattumillu immikkoortumi matumani oqaatigineqartut oqaaseqartartunit aappasaaneerinninnermi sukumiisumik isummerfigineqarnissaat ataatsimiititaliamit assut neriuutigineqarpoq.

Ataatsimiititaliaq immikkoortoq 12-imi inatsisissatut siunnersuummut arlalinnik kaammattuuteqarpoq kiisalu immikkoortoq 13-imi inatsisissatut siunnersuummut ataatsimiititaliaq inassuteqaateqarluni.

Kiisalu aalajangiinerit Naalakkersuisunut nassiunneqarnerat ilutigalugu takuneqarsinnaasunngortinneqarnissaat Aningaasaqarnermut Akileraartarnermullu Ataatsimiititaliap anguniartaraa oqaatigineqassaaq. Taamaalillutik aningaasaliissuteqarnissamik suliassanut atatillugu Aningaasaqarnermut Akileraartarnermullu Ataatsimiititaliap ukiuni kingullerni aalajangiineri tamarmik www.inatsisartut.gl/FU-mi nassaassaapput. Aalajangiinerit suliap normuata aammalu Aningaasaqarnermut Akileraartarnermullu Ataatsimiititaliap ulloq

aalajangiiffigisaata kiisalu sammineqartup ataani ilanngunneqartarput. Suliaq pillugu naammaginartumik paasissutissiisimanninneq allatigulluunniit amigaatit amerlasuutigut tunngavigalugit Aningaasaqarnermut Ataatsimiititaliaq aalajangiinissaminik kinguartsisariaqartarmat suliap normuata ataatsip ataani aalajangiinerit arlallit ilanngunneqarsinnaasarpup. Taamaattumillu suliap normuata kingorna kisitsimmik allassimasoqartarpoq, tassuunakkut takutinneqartarluni suliami ataasiarluni, marloriarluni pingasoriarluniluunniit aalajangiisoqarsimasoq, soorlutaaq Aningaasaqarnermut Akileraartarnermullu Ataatsimiititaliaq aalajangiinerata ullua nalunaarneqartarpoq.

Aningaasaqarnermut Akileraartarnermullu Ataatsimiititaliaq ataatsimiinnissani pillugit ukiumoortumik pilersaarusiortarpoq pilersaarullu taanna ataatsimiititaliaq nittartagaani takuneqarsinnaavoq. Ataatsimiittarnissanut pilersaarutip Naalackersuisunit ilisimaneqarlunilu ataqqineqarnissaa ataatsimiititaliaq naatsorsuutigineqarpoq. Aningaasaliissuteqarnissamik qinnuteqaatinik kingusinaarluni nassiussisoqarnera pissutigalugu 2013-imi ulloq 23. december ataatsimiititaliaq ataatsimiittariaqarsimavoq. Ataatsimiititaliaq 2014-imi ataatsimiinnissaa kingulleq ulloq 17. december pissaaq ataatsimiittarnissamullu pilersaarummi allassimasutut ataatsimiinneq tamanna suliat siusinnerusukkut nassiunneqareersut naammassineqarnissaannut taamaallaat naatsorsuussaavoq. Tamanna ima isumaqarpoq Aningaasaqarnermut Akileraartarnermullu Ataatsimiititaliaq 2014-imi ataatsimiinnissaa kingulleq ulloq 3. decemberimi ingerlanneqassasoq, taamaattumillu aningaasaliissuteqarnissamik suliassanik Naalackersuisut nassiussinissaat kingusinnerpaamik tallimangornermi ulloq 28. november 2014-imi pissaaq.

Taama oqaaseqarluni Aningaasaqarnermut Akileraartarnermullu Ataatsimiititaliaq inatsisissatut siunnersuutip aappassaaneerineqarneranut isumaliutissiissuteqarpoq.

2. Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit

Inatsisartut 1999-imi ukiakkut ataatsimiinnerminni missingersuusiornermut inatsit akuersissutigaa. 2000-imi upernaakkut ataatsimiinnermi inatsimmi § 10 allanngortinneqarpoq, taamaalillunilu Inatsisartut aningaasanut inatsisaat ukiup aningaasanut inatsisip atuuffiata siuliani ulloq 15. november nallertinnagu akuersissutigineqartarpoq.

Missingersuusiornermut inatsisikkut missingersuusiornermi tunngaviit pioreersut aalajangersakkatigut maleruagassiuunneqarput erseqqissarneqarlutillu, taakkunungalu ilaavoq Inatsisartut ukiumi aningaasanut inatsisip atuuffiani aningaasaqarnikkut tulleriiarinerata aningaasanut inatsimmi ataatsimoortumik ingerlanneqartariaqarneranik tunngavik.

- Aningaasaqarnerup naalackersuinikkut tamakkiisumik eqqumaffigineqarsinnaaneramik, aamma
- tamakkiisumik tamanut sammititamik tulleriiarisarnissamik anguniagaqarneq aallaavigalugu taama tunngaveqarneq qitiusumik inissisimavoq.

Taamaattorli aningaasaliissuteqarnissamik pisariaqartitsilerneq aningaasanut inatsisip akuersissutigineqarnerani siumut naatsorsuutigereerneqarsinnaasimanngippat Naalakkersuisut qinnuteqarnerisigut nutaanik aningaasartuuteqarnissaq Aningaasaqarnermut Akileraartarnermullu Ataatsimiititaliamit akuerineqarsinnaavoq. Aningaasaqarnermut Akileraartarnermullu Ataatsimiititaliap siusinnerusukkut aningaasaliissutigisai, *ilassutitut aningaasaliissutitut* taaneqartartut, ilassutitut aningaasaliissutininut inatsisikkut aalajangersagannortinneqartarput. Tamatuma malitsigisaanik ilassutitut aningaasaliissutininut inatsit maanna tassaalerpoq kingusinnerusukkut aningaasaliissutininut inatsit, ukioq aningaasanut inatsisip atuuffia naareeraangat akuersissutigineqartartoq.

Missingersuusiornermut inatsit ulloq 1. januar 2001 atuutilerpoq, taamaattorli aalajangersakkat ilaat, soorlu sanaartugassanut iluarsagassanullu aningaasaateqarfiup pilersinneqarneranut tunngasoq aamma ilassutitut aningaasaliissuteqartarnerit pillugit aalajangersakkat ulloq 1. januar 2000 atuutilerlutik.

Aningaasaliissutit, aningaasaliissutinik allannguinerit aningaasaleeriaatsillu assigiinngitsut pillugit missingersuusiortarnermut inatsimmi aalajangersakkanik Inatsisartut (Naalakkersuisullu) eqqumaffinneqqullugit minnerunngitsumillu aningaasaliissutit Inatsisartut aalajangigaat ataqqineqaqqullugit missingersuusiornermut inatsimmi aalajangersakkat qitiusut ilaasa isumaliutissiisummut matumunnga aallarniutigalugit ilanngunneqarnissaat Aningaasaqarnermut Akileraartarnermullu Ataatsimiititaliamit pissutissaqarsorineqarpoq.

Ataatsimiititaliamit naatsorsuutigineqarpoq Inatsisartunut ilaasortatoqqat ilaasortallu nutaat saqqummiussineq una iluaqutigissagaat aammalu aningaasaliissutininut inatsisunik suliaqarnermini atorsinnaassagaat.

2.1 Aningaasaleeriaatsit

Missingersuusiornermut inatsisip imarai aningaasaleeriaatsit assigiinngitsut aalajangersakkatigut maleruagassiuunneqarlutillu erseqqissarneqarnerat aamma aningaasaliissutit atornerqarnissaannut maleruagassat kiisalu aningaasaliissutit nutaat allanngukkallu assigiinngitsut aalajangersakkatigut maleruagassiuunneqarnerat. *Aningaasaleeriaatsit* makkuupput:

- ingerlatsinermut aningaasaliissutit
- tapiissutitut aningaasaliissutit
- aningaasaliissutit inatsisitigut pisussaaffigisat
- sanaartornermut aningaasaliissutit, aamma
- isertitassatut aningaasaliissutit.

Missingersuusiornermut inatsisip nassataraa sanaartornermut tunngasuni sanaartugassanut iluarsagassanullu aningaasaateqarfimmik, missingersuusiornermik tunngaveqartumik pilersitsisoqarnera, tamatumalu kingunerisaanik pissutsit teknikimut tunngassuteqartut aningaasaqarnikkut sunniutaat, soorlu sanaartornerit ingerlanneqarnerisa sukkassusaasa allanngorneri aamma sanaartukkanut aningaasaliissuteqaqqinnissat pillugit apeqqutit, aningaasaliissutininut inatsisini ilanngunneqartussaajunnaarput. Tamanna pillugu isumaliutissiisummi matumani immikkoortoq 4.10 takuuk.

2.2 Aningaasaliissuteqartarnermi tunngaviit

Aningaasanut inatsimmi missingersuutitut ilanngussani tamani *Aningaasaliinermi tunngavigineqartut* ataanni aningaasaliinermi tunngavigineqartut erseqqinnerusumik paasissutissiisutigineqartassapput, ilaatigut:

- Aningaasaliissutit kingusinnerusukkut atugassanngortinneqarnissaat, aamma
- naatsorsuutit inaarsaanermut atatillugu aningaasaliinermi tunngavigineqartut qanoq eqquutsinneqartigisimanerannik nalilersuisinnaanissap periarfissaqarnissaa siunertaralugu.

3. Aningaasaliissutit pillugit missingersuusiornermut inatsimmi aalajangersakkat

Missingersuusiornermut inatsimmi § 1, imm. 3-mi aalajangersarneqarpoq:

Aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsoq.

§ 3-mi aalajangersarneqarpoq:

“Aningaasaliissuteqarneq Naalakkersuisunut ilaasortap aalajangersakkat erseqqinnerusut malillugit aningaasanik atuinissaanut piginnaatitsissutaasoq. Naalakkersuisunut ilaasorta q sukulluunniit Naalakkersuisunut ilaasortaasoq Naalakkersuisoqarfimmu pineqartumut aningaasaliissutitut akisussaavoq.”¹

4. Ilasutitut aningaasaliissutitut inatsit

4.1 Aningaasaliissutit iliutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allanngortitaluunniit pillugit aalajangersakkat malittarisassiuunneqarput, taamaalillutillu *Ilasutitut aningaasaliissutitut inatsimmi* aalajangersakkat tunngaviusut taakkunani malittarisassiuunneqarput. § 25, imm. 1-imi aalajangersarneqarpoq

„ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqaarnissamullu imaluunniit aningaasaliissutit oqaasertaliussanilluunniit allanngortitsinissamut piumasaqaataasoq Inatsisartut Aningaasaqarnermut Akileraartarnermullu Ataatsimiititaliaat Inatsisartut sinnerlugit akuersissuteqaqqaarsimassasoq.“

Aalajangersakkakut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Akileraartarnermullu Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq

ukiup aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit

¹ Inatsit namminersorneq pillugu 2009-mi inatsit sioqqullugu oqaasertalersorneqarpoq, tamannalu inatsimmit issuakka-nit isumaliutissiisummi atorneqartunit takuneqarsinnaavoq.

oqaasertaliussallu allanngortinneqartut aningaasaliissutigineqarnermik kingorna ilassutitut aningaasaliissutitut inatsimmut ilanngunneqartassasut.

Aammattaaq iliuitsit oqaasertaliussamik aalajangersakkatigut tunngavillit ilassutitut aningaasaliissutitut inatsimmut ilanngunneqartartussaapput.

4.2 Ilassutitut aningaasaliissutitut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalakkersuisut ilassutitut aningaasaliissutitut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquusumik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap aamma Aningaasaqarnermut Akileraartarnermullu Ataatsimiititaliap siusinnerusukkut aalajangigaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2013-mi aningaasanut inatsit aamma 2013-imi ilassutitut aningaasaliissutitut inatsit katillutik aningaasaliissutit oqaasertaliussallu 2013-mi atuuttut suunerinik takussutissiisussaapput. Taamaalillutik aningaasaliissutit 2013-mi aningaasanut inatsimmi aamma 2013-mi ilassutitut aningaasaliissutitut inatsimmi ilaatinneqartut, taakkunungalugu ilanngullugit sanaartugassanut tunngasuni *suliassanut aningaasaliissutit, Nunatta Karsiata 2013-mi naatsorsuutaanut aamma 2013-imi Sanaartugassanut Iluarsagassanullu Aningaasaateqarfik pillugu Nassuiaammut* tunngaviupput. Nunatta Karsiata naatsorsuutai Sanaartornerlu pillugu Nassuiaat Inatsisartut upernaakkut ataatsimiinneranni nalinginnaasumik saqqummiunneqartarput.

4.3 Sulianik Inatsisartuni suliassanngorlugit innersuussisarnerit

Sulianik Inatsisartut Aningaasaqarnermut Akileraartarnermullu Ataatsimiititaliaata arlaannik pissuteqarluni isummerfigisinnaanngisaanik isummerfigiumanngisaanilluunniit peqarsinnaasarpoq, soorlu suliaq tunngaviulluinnartumik aallaaveqarpat, aningaasartai annertuppata imaluunniit Aningaasaqarnermut Akileraartarnermullu Akileraartarnermullu Ataatsimiititaliap Inatsisartut suliaq pillugu isumaat nalornissutigippagu. Tamatumani Aningaasaqarnermut Akileraartarnermullu Ataatsimiititaliap suliamik Inatsisartunut suliassanngortitsilluni innersuussisinaaneranut periarfissaqarpoq. 2013-mi sulianik Inatsisartunut innersuussisoqanngilaq. Ukiuni arlalinni ataatsimut isigalugu taamaattoqarsimanngilaq.

4.4 Aningaasaliissutit inatsisitigut pisussaaffigisat isertitassatullu aningaasaliissutit

Aningaasanut inatsimmi aningaasaliissutigineqartoq inatsisitigut pisussaaffigisaq ukiup ingerlanerani siunertamut tassunga aningaasartuutaajumaartut naatsorsuutigisanik sapinngisamik pitsaanerpaamik *missingiiner*mut takussutissaasarpoq. Aningaasartuuteqarnissat immikkut inatsisiliani aalajangersarneqartarput, soorlu pensionisariatitassatut aningaasartuutissanut, aningaasanut inatsimmi aningaasaliissuteqarnersoq aningaasaliissuteqannginnersorluunniit apeqqutaatinnagu pensionisiaqartinneqarsinnaasunut tamanut aalajangersimasunik aningaasartaqarlutik tunniunneqartartussanut, tunngatillugu taamaattoq.

Taamaalillutik aningaasaliissutitut inatsisitigut pisussaaffigisanut tunngatillugu aningaasartuuteqarnerussutit aningaasartuutikinnerussutilluunniit ingerlaannarlutik aningaasartuutigineqarsinnaapput ilassutitullu aningaasaliissuteqaataanissaat piumasaqaataanani. Aningaasaliissutitut naleqqiullugu allannguutit ukiumi aningaasanut inatsisip atuuffiani naatsorsuutini taamaallaat takuneqarsinnaapput.

Taamaallaat aningaasaliissutinut inatsisitigut pisussaaffigisanut naleqqiullugu aningaasartuuteqarnerussutit aningaasartuutikinnerussutilluunniit ilassutitut aningaasaliissutinut inatsimmut ilanngunneqartassapput aningaasartuuteqarnerussutaasoq aningaasartuutikinnerussutaasorluunniit inatsisilianik nutaanik allanngukkanilluunniit tunngaveqaraangat aningaasaliissutigineqartorlu Aningaasaqarnermut Akileraartarnermullu Ataatsimiititaliamit akuersissutigineqarsimagaangat.

Aningaasanut inatsisimmi isertitassat aningaasanut inatsisissatut siunnersuutip suliarineqarnerata nalaani missingerneqartut aningaasanut inatsimmi aningaasartuutissanut killigitassanik tulleriinnilersuineranut aalajangiisooqataalluinnartarput.

Taamaalilluni Namminersorlutik Oqartussat aningaasartuutaannik ukiumoortumik ataatsimut tulleriinnilersuinerup malitsigisarpaa ukiup aningaasanut inatsisip atuuffiata ingerlanerani isertitatut aningaasaliissutit nalinginnaasumik allannguuteqassanngitsut. Allannguuteqartoqarsimassappat taakku aningaasartuutit inatsisitigut pisussaaffigisat assigalugit Nunatta Karsiata naatsorsuutaanut ilanngunneqartartussaapput.

Tamanna ima paasineqassaaq:

- Naalakkersuisut isertitatut aningaasaliissutit aningaasanut inatsimmi isertitassatut missingersuusiukkanut naleqqiullutik allanngorarneri malinnaaffigisassagaat
- Naalakkersuisut aningaasaliissutit inatsisitigut pisussaaffigisat aningaasanut inatsimmi tunngavissaatinneqartunut naleqqiullutik allanngorarneri malinnaaffigisassagaat
- taakku allannguuteqartinneqarnissaat ukiup aningaasanut inatsisip atuuffiata nalaani qinnuteqaatigineqassanngitsosq, kisiannili Naalakkersuisut taamaattoqarnera soorunami eqqumaffigisassagaat aammalu tamanna qissimigaarlugu ataatsimoortumik aningaasatigut aqutsinertik aqqissuuttassagaat
- taamaallaat aningaasaliissutit taakku inatsisitigut allannguutinik aalajangersimasunik tunngaveqaraangata aningaasaliissutit taakku ilassutitut aningaasaliissutinut inatsimmut ilanngussat aqqutigalugit aalajangersakkatigut allanngortinneqarnissaat qinnuteqaatigineqartartussaavoq.

4.5 Aningaasaleeriaatsit allannguuteqartinneqarnerminni Aningaasaqarnermut Akileraartarnermullu Ataatsimiititaliamit akuersissutigineqartut

Immikkoortup 4.4-p malitsigisaanik Aningaasaqarnermut Akileraartarnermullu Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsinermut aningaasaliissutit*
- *tapiissutitut aningaasaliissutit, aamma*
- *sanaartornermut aningaasaliissutit.*

Taakku avataatigut soorunami ilaapput oqaasertaliussat suliasallu allat, pissutsit immikkut ittut pissutigalugit Naalakkersuisut atugassiinissaminni ataatsimiititaliamut akuerittariaqarsimasaat.

4.6 Maleruagassanik erseqqinnerusunik aalajangersaanissamut tunngavissat

Aningaasaqarnermut Naalakkersuisoq maleruagassanik erseqqinnerusunik Missingersuusiornermut Malittarisassami aalajangersaasassasoq missingersuusiornermut inatsimmi § 20-imi 33-imi ilaatigut allassimavoq.

Missingersuusiornermut Malittarisassaq atuuttoq taamani Aningaasaqarnermut Nunanullu Allanut Naalakkersuisuusumit 17. juni 2008-mi nassiunneqarpoq. Missingersuusiornermut Malittarisassaq kaajallaasitatut atuuppoq, taamaalillunilu ingerlatsivimmit saneqqunneqarsinnaanani. Aningaasaliissuteqarnissamik suliassamik suliarininnermut atatillugu malittarisassani aalajangersakkanik saneqqutsinissaq pillugu aalajangersimasumik tunngavilersorluakkamillu Aningaasanut Naalakkersuisoq immikkut akuersissutiginnissimappat, tamanna aningaasaliissuteqarnissamik Aningaasaqarnermut Akileraartarnermullu Ataatsimiititaliamut qinnuteqaammi immikkut allaqassaaq. Missingersuusiornermut malittarisassanik saneqqutsineq immikkullu akuersissuteqarneq pillugu 2008-mi ilassutitut aningaasaliissutinut inatsimmut Aningaasaqarnermut Akileraartarnermullu Ataatsimiititaliap isumaliutissiissutaani immikkoortoq 10.3.5 innersuussutigineqarpoq.

4.7 Aningaasaliissutinik allannguissamik qinnuteqaateqarnissamut piumasaqaatit

Missingersuusiornermut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut

- *pingaarutillit*, aamma
- aningaasanut inatsisissap suliarinerani *sillimaffigereerneqarsinnaasimannigitsunut* tunngasut.

Aalajangersagaq ima paasineqassaaq aningaasaliissuteqartoqarnissaanik tassanngaannartumik pisariaqartitsisoqalersimassasoq, tamannalu peqatigitillugu arlaatigut pingaaruteqartuussasoq. Aningaasaliissuteqartoqarnissaanik pisariaqartitsinerit aningaasanut inatsisissap suliarineqarnerani puiguisimanernik taamaaqataanilluunniit tunngaveqartut imaluunniit nutaanik aningaasaliissuteqartoqarnissaanik kissaateqarnerit ukiup tulliani aningaasanut inatsisissamut utaqqinneqarsinnaasut ukiup aningaasanut inatsisip atuuffiata ingerlanerani Aningaasaqarnermut Ataatsimiititaliamut Akileraartarnermullu qinnuteqarnissamut tunngaviginierneqarsinnaanngisaannarput.

§ 28, imm. 3-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut ukiup aningaasanut inatsisip atuuffiata ingerlanerani aningaasartuuteqarnikkut sunnuteqartussanut tunngasuussasut. Taamaalilluni Inatsisartut Aningaasaqarnermut Akileraartarnermullu Ataatsimiititaliaata ukiup aningaasanut inatsisip atuuffiata ingerlanerani kinguneqaataasussat kisiisa isummerfigisinnaavai, ukiunilu tullerni kinguneqaataajunnartut aningaasanut inatsisissami tullermi ilanngunneqartussaapput.

Kiisalu § 28, imm. 4-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit paasissutissanik attuumasuteqartunik tamanik imaqartassasut, taakkunungalu ilaassallutik qinnuteqaatip aningaasaqarnikkut toqqaannartumik toqqaannangitsumilluunniit kingunerisassai pillugit paasissutissat tamakkiisut.

Ulluinnarni periususartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allanngortinneqarnissaannik qinnuteqaammik Aningaasaqarnermut Akileraartarnermullu Ataatsimiititaliamut nassiussisarpoq. Pappialat atortussat nassiunneqartut

kontonut pingaarnernut, aningaasaliissutinik allanngortitsiffiginiarlugit qinnuteqaatigineqartunut, missingersuutininut ilanngussanik imaqartussaapput.

Pisuni arlalinni missingersuutininut ilanngussat nassiunneqartut naatsuarakasiusarsimapput suliarlu pillugu illersorneqarsinnaasumik naliliinissamat periarfissaqartitsinatik. Aningaasaqarnermut Akileraartarnermullu Ataatsimiititaliap pappialat Naalakkersuisut namminneq najoqqutaasa *Naalakkersuisut isummernissaannut tunngavissiat* nuutinneri tigugajuttarmagit missingersuutininut ilanngussap ilusiligaanera nalinginnaasumik ataatsimiititaliap suliamik suliarinninneranut aalajangiisuusumik pingaaruteqarneq ajorpoq.

Missingersuutinulli ilanngussat allagaatini kisiartaallutik aningaasaliissutinik allannguinnermut tunuliaqutaasumut nassuiaatitut ilassutitut aningaasaliissutinut inatsimmi ilanngunneqartarmata Aningaasaqarnermut Akileraartarnermullu Ataatsimiititaliap missingersuutininut ilanngussat kisimiillutik atuarneqarsinnaanngorlutik ilusilerneqartarnissaat annertuumik pingaartippaa. Missingersuutininut ilanngussat Inatsisartunut ilaasortanit kikkunnillu tamanit Naalakkersuisut isummernissaannut tunngavissianik immikkuualuttunilluunniit allanik tapertaqartinneqaratik atuarneqarsinnaasariaqarput.

Paasissutissat makku missingersuutininut ilanngussami ilaatinneqartussaapput::

- Aningaasaliissutit suuneri
- aningaasaliissutit allannguutissaattut qinnuteqaatigineqartoq kr.-inngorlugu (1.000 kr.-ikkaartunut akunnaallillugu),
- allannguutissatut qinnuteqaatigineqartup kingorna ukiup aningaasanut inatsisip atuuffiata ingerlanerani aningaasaliissutit amerlassuseriligassaat pillugit paasissutissiissutit,
- allannguutissatut qinnuteqaatigineqartup nassuiarnera tunngavilersuutitaalu,
- sulisoqarnermut tunngasut allannguuteqarnissaat naatsorsuutigineqarpat tamanna paasissutissiissutigineqassaaq (ukiut naallugu sulisorisat uuttuutigalugit),
- ukiunut missingersuusiortinnut kinguneqassappat tamanna paasissutissiissutigineqassaaq,
- ingerlatsinerneqartut sanaartukkanullu aningaasatigut toqqaannartumik aamma/imaluunniit toqqaannangitsumik kinguneqassappat tamanna paasissutissiissutigineqassaaq
- suliaassami kisitsisit allannguuteqarsimappata paasissutissiissutigineqassaaq.

Taamaalilluni *allannguutissatut qinnuteqaatigineqartup nassuiarnerata tunngavilersuutitaatalu* suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqissarneqassaaq *allannguutip* aningaasanut inatsimmi tunngavissaatitaasunut naleqqiullugu qanoq ittuunera pingaarnepaatinneqassasoq.

Kiisalu erseqqissarneqassaaq isummernissamat tunngavissiat Aningaasaqarnermut Akileraartarnermullu Ataatsimiititaliamit aalajangiiffigisassat tusarniaassutigineqartarneranni maleruagassat tamakkiisumik malinneqartarnissaat Aningaasaqarnermut Akileraartarnermullu Ataatsimiititaliamit assut pingaartinneqarmat. Tamatumani pineqarluni tusarniaavigisassat, matumanilu minnerunngitsumik Aningaasaqarnermut Naalakkersuisoqarfiup tusarniaavigineqarsimanissaat tusarniaanermullu akissutip isummernissamat tunngavissiamut ilanngunneqarsimanissaa. Assersuutigalugu isummernissamat tunngavissiap nassiunneqannginnissaata tusarniaanermut akissutini kaammattuutigineqarnera pissutigalugu tusarniaanermut akissut ilanngunneqarsinnaatinnagu tusarniaanermut akissut isummernissamat

tungavissiami oqaaseqarfigineqassaaq aammalu isummernissamut tungavissiap Aningaasaqarnermut Akileraartarnermullu Ataatsimiititaliamut nassiunneqarnerani ilanngunneqarluni. Tusarniaanermut akissummik isummernissamut tungavissiamut isornartorsiuisumik peqartoq paasissutissiissutigiginagu isummernissamut tungavissiamik Aningaasaqarnermut Akileraartarnermullu Ataatsimiititaliamut nassiussisoqarpat, tamatuma Naalakkersuisunut ilaasortat akisussaanerat pillugu Inatsisartut inatsisaannik (Naalakkersuisut akisussaanerannut inatsimmik taaneqartartumik) unioqqutitsinerusinnaaneratigut tamatuma pisariaqarnera ersersinneqarpoq. Taamaalilluni Naalakkersuisunut ilaasortaq isummernissamut tungavissiamik Aningaasaqarnermut Akileraartarnermullu Ataatsimiititaliamut nassiussisoq paasissutissanik pingaarutilinnik Aningaasaqarnermut Akileraartarnermullu Ataatsimiititaliamut – naggataatigullu Inatsisartunut – napangiussinnginnissamut pisussaaffeqarpoq.

4.8 Ilassutit aningaasaliissutitut inatsisip imarisai

Ilassutit aningaasaliissutitut inatsisip imarisarpaa inatsisip ileqqussat naapertorlugit oqaasertaa, ukununga tungasunik nalinginnaasumik marlunnik paragrafeqartartoq:

- *aningaasaliissutit* allannguutaat, aamma
- *aningaasanut inatsimmi oqaasertaliussat* allannguutaat.

Ilassutit aningaasaliissutitut inatsimmiittarpoq *Aningaasaliissutitut takussutissiaq*, ilanngussaq 1, kontonut pingaarnernut allannguuteqartunut tungatillugu aningaasanut inatsimmi aningaasaliissutitut, ilassutit aningaasaliissutitut aamma aningaasaliissutitut tamarmiusunik ilaatigut takussutissiisoq.

Taakku saniatigut ilassutit aningaasaliissutitut inatsisip imarai *inatsisip oqaasertaanut nassuiaatit*. Nassuiaatit imaraat

- *missingersuutitut ilanngussat*, ilassutit aningaasaliissutitut ataasiakkaanut tungatillugu missingersuusiormi tungavilersuutitut imallit, kiisalu
- *oqaasertaliussanut nassuiaatit*.

Taakku saniatigut ilassutit aningaasaliissutitut aningaasaleeriaatsinut, oqartussaaffeqarfinnut suliaasaqarfinnullu agguataarnerinut takussutissiaq Naalakkersuisut 2013-mi ilassutit aningaasaliissutitut inatsisissatut siunnersuutaanni ilanngunneqarsimavoq.

4.9 Aningaasartuutitut isertitanillu nakkutillineq

Missingersuusiormermut inatsimmi kapitali 7-imi aalajangersakkat naapertorlugit Naalakkersuisut Inatsisartut ukiup aningaasanut inatsisip atuuffiata ingerlanerani aningaasaqarnikkut tamakkiisumik tulleriinnilersuinerata eqquutsinneqarnissaa qulakkeerniarlugu aningaasartuutitut isertitanillu ingerlaavartumik nakkutilliinissartik pisussaaffigaat. Taamatuttaaq Naalakkersuisut Namminersorlutik Oqartussat aningaasartuutaasa isertitaasalu nikerarneri pillugit paasissutissanik pissarsiniartarneq ingerlatitseqqittarnerlu pisussaaffigaat, taakkununga ilanngullugit aningaasanut inatsisip tungavilersuutitai.

Aalajangersakkat taakku malillugit aningaasaqarnikkut ingerlatsineq pillugu nalunaarut aammalu missingersuutit pillugit ilisimatitsissutit Inatsisartunut aammalu Aningaasaqarnermut Akileraartarnermullu Ataatsimiititaliamut saqqummiunneqartarput.

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik saqqummiussinissaq Naalakkersuisut taamaallaat pisussaaffigaat. Tassani augustip naanerani missingersuutitut kisitsisit tunngaviugajuttarsimapput. 2005-imili taamani Aningaasaqarnermut Ataatsimiititaliaasup Naalakkersuisuusullu isumaqatigiissutigaaq aprilip naanerani missingersuutitut ilisimatitsissut ilanngullugu Naalakkersuisut siunissami suliarisallissagaat.

Aningaasaqarnermullu Akileraartarnermullu Ataatsimiititaliap peqqinnissaqarfiup aningaasaqarnikkut inissisimanagera pillugu ilisimatitsissut kisiat tiguua. Aningaasaqarnermut Akileraartarnermullu Ataatsimiititaliap kiisalu Inatsisartut Ilaqutariinnermut Peqqissutsimullu Ataatsimiititaliaata 1. augsut 2013-imi ilisimatinneqarnissaannik Naalakkersuisut aalajangigaat aatsaat 19. september 2013-imi piviusunngortinneqartoq ataatsimiititaliamit oqaatigineqassaaq. Tamanna soorunami isumakulunnarpoq, taamaattumillu missingersuutit pillugit ilisimatitsissutit ingerlaavartumik nassiunneqartarnerat piaartumik ingerlateqqinneqassasoq ataatsimiititaliamit **kaammattuutigineqarpoq.**

4.10 Sanaartornermut Iluarsaanermullu Aningaasaateqarfik kiisalu sanaartorneq pillugu ukiumoortumik nassuiaat

Sanaartornermut tunngasunik aqutsinerup patajaallisarneqarnissaa siunertaralugu sanaartornermut inatsit aqutugalugu Sanaartornermut Iluarsaanermullu Aningaasaateqarfimmik pilersitsisoqarpoq. Aningaasaateqarfiup nassataraa sanaartorerup nikinnerata nassatarisaanik ukiut aningaasanut inatsisit atuuffiisa akornini akiluteqartarnerit nikinneri aningaasaateqarfimmi nalimmassarneqartarnerat, taamaalillunilu aningaasanut inatsimmi aammalu ilassutitut aningaasaliissutitut inatsimmi teknikikkut iluarsiiinerit amerlasuut pinngitsoortinneqarsinnaallutik. Tamatuma peqatigisaanik pisortat sanaartugassaataasa tamakkiisut sanaartortut sanaartorsinnaassusiannut naapertuussarnissaannut periarfissat aningaasaateqarfikkut pitsaanerulersinneqarput.

Sanaartornermut Iluarsaanermullu Aningaasaateqarfik missingersuuserinermi naatsorsuuserinermilu teknikikkut aningaasaateqarfiinnaavoq Nunattalu Karsianut ilaasoq. Tassa pingaarutilinni tamani aningaasaateqarfik Nunatta Karsianut naligiisinneqarsinnaalluni, soorluttaa aningaasaateqarfiup aningaasaatai tigorianaat Nunatta Karsiata aningaasaataasa tigorianaat ilagigaat. Tassa imaappoq; ernianit isertitat ernianullu aningaasartuutit il.il. Nunatta Karsianut nakkartussaapput Nunattalu Karsiata ernianut aningaasartuutaasa ernianillu isertitaasa sinnerinut ilanngunneqartussaallutik.

Sanaartugassanut aningaasaliissutitut aningaasanut inatsimmi aningaasartuutit ukiup aningaasanut inatsiseqarfiusup aallartinnerani aningaasaateqarfimmut nuunneqassapput, taamaalillutillu aningaasaateqarfimmi isertitatut ilanngunneqassallutik. Aningaasaateqarfiup aningaasartuutai tassaapput sanaartugassatut suliat naammassineqarneri naapertorlugit akiliutit. Aningaasartuutit Sanaartornermut Iluarsaanermullu Aningaasaateqarfiup naatsorsuutaani ilanngunneqassapput. Sanaartukkat nikinnerisa nassatarisaanik akiluteqartarnerit nikinneri aningaasaateqarfimmi nalimmassarneqartarput.

Sanaartugassatut suliassat taamaatinneqarnerisa kingunerisaanik aningaasartuutikinnerussutit sanaartukkaniluunniit ataasiakkaani aningaasartuutikinnerussutit allat suliassaq inaarlugu naammassineqareerpat Nunatta Karsianut utertinneqassapput. Taamatut utertitat Sanaartornermut

Iluarsaanermullu Aningaasaateqarfimmi aningaasartuutitut ilanngunneqassapput aammalu aningaasanut inatsimmi ilassutitulluunniit aningaasaliissutitut inatsimmi isertitatut ilanngunneqassallutik. Pisunilu amerlasuuni Sanaartugassanut Iluarsagassanullu Aningaasaateqarfimmit aningaasat konto pingaarneq 80.00.10, Sanaartugassanut Iluarsagassanullu Aningaasaateqarfimmit utertitat, aqquutigalu sanaartornermi pilersaarutitut nutaanut toqqaannartumik atorneqartussatut utertinneqartarput.

Missingersuusiortnermut inatsimi § 24 naapertorlugu Naalakkersuisut Sanaartugassanut Iluarsagassanullu Aningaasaateqarfiup ingerlatai pillugit ukiumoortumik nassuiaasiortassapput. Nassuiaatip ilaatigut imarissavaa sanaartugassatut pilersaarutit ataasiakkaat killiffiannut naalunaarsuut aningaasartuutinik isertitanillu naatsorsuutitut ilanngunneqartunik imalik. Taamaalillunilu nassuiaat Nunatta Karsiata naatsorsuutaasa nalinginnaasut ilagaat. Tamannalu pissutaalluni Nunatta Karsiata naatsorsuutaasa upernaakkut ataatsimiinnermi siulermeeqarnerannut atatillugu nassuiaat Inatsisartunit suliarineqartariaqarpoq.

Sanaartugassanut Iluarsagassanullu Aningaasaateqarfimmit aningaasaliussat **piviusorsioortumik ingerlaartinneqarnissaat** Naalakkersuisunit annertunerusumik qulakkeerniarneqartassasoq Aningaasaqarnermut Akileraartarnermullu Ataatsimiititaliap kingullermik 2014-imi aningaasanut inatsisissatut siunnersuutip aappassaaneerneqarnissaanut isumaliutissiissummini **kaammattuutigaa**. Kaammattuut taanna pingaaruteqarpoq, tassami sanaartornermut pilersaarutit kingusinaartut piviusunngortinneqanngitsulluunniit pissutigalugit aningaasaateqarfimmi aningaasat amerliartuinnarnerat Inatsisartut sanaartugassanut aningaasanik pingaarnersiuiunerannut naapertuutinnimmat. Aammattaarli erseqqissaatigineqassaaq siuliani oqaatigineqartutut Sanaartugassanut Iluarsagassanullu Aningaasaateqarfik tassaaginnarmat missingersuusiortarnikkut ilusililineq aammalu aningaasaateqarfimmi aningaasat killeqanngitsuunngimmata. Ukiuni makkunani sanaartugassanut atugassiissutit ikiliartorfianni aningaasaateqarfimmi aningaasat katersorneqartut aamma ikileriaateqarnissaat naatsorsuutigineqassaaq.

5. Naalakkersuisut 2013-imi Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaataat

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaasertaliussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussa 36-it Aningaasaqarnermut Akileraartarnermullu Ataatsimiititaliamit 2013-imi suliarineqarput. 2013-mi ukiunilu siuliini suliat amerlassusiat takussutissiami ataaniittumi takuneqarsinnaavoq.

Ukiq	Suliat amerlassusiat
2001	66
2002	48
2003	57
2004	82
2005	69
2006	56
2007	84
2008	93
2009	58
2010	64

2011	44
2012	51
2013	36

Kisitsisinit takuneqarsinnaasutut suliassat ataatsimiititaliamit suliarineqartussat 2008-mili ikiliartuaarsimasutut isikkoqarput. Tamanna tunngaviusumik isigalugu pitsaasuvoq, tassami aningaasaliissuteqarnissamik Aningaasaqarnermut Akileraartarnermullu Ataatsimiititaliamut amerlasuunik suliassanngortitsisarneq nunatta karsiata aningaasartuutaanik *ataatsimut pingaarnersiunerup* aningaasanut inatsimmi takuneqarsinnaanissaanik missingersuusiortarnermut inatsimmi tunngavissaritinneqartumut ikorfartuutaasutut isigineqarsinnaanngimmat.

Suliassat aalajangiiffigisassat 36-it pineqartut Aningaasaqarnermut Naalackersuisumit tiguneqarnermik kinguinngua Aningaasaqarnermut Akileraartarnermullu Ataatsimiititaliamit nalinginnaasumik suliarineqartarsimapput.

Suliassanit 36-init taaneqartunit 13-it (36 %-it missaata nalingi) piffissami 1. septemberimit 2013-mi decemberip naanissaata tungaanut Naalackersuisunit suliarineqarsimasut Aningaasaqarnermut Akileraartarnermullu Ataatsimiititaliap paasissutissiisutiginnaavaa.

Ukiuni siuliini ima agguataarsimapput:

2004-mi september - decemberimi suliassanit 82-init 44-t suliarineqarsimapput, tassa 54 %-it nalingi.
 2005-mi september - decemberimi suliassanit 69-init 35-t suliarineqarsimapput, tassa 51 %-it nalingi.
 2006-mi september - decemberimi suliassanit 56-init 30-it suliarineqarsimapput, tassa 54 %-it nalingi.
 2007-mi september - decemberimi suliassanit 84-init 31-it suliarineqarsimapput, tassa 37 %-it nalingi.
 2008-mi september - decemberimi suliassanit 93-init 28-it suliarineqarsimapput, tassa 30 %-it nalingi.
 2009-mi september – decemberimi suliassanit 58-init 28-it suliarineqarsimapput, tassa 48 %-it nalingi.
 2010-mi september – decemberimi suliassanit 64-init 30-i suliarineqarsimapput, tassa 47 %-it nalingi.
 2011-mi september – decemberimi suliassanit 44-init 14-it suliarineqarsimapput, tassa 32 %-it nalingi.
 2012-mi september – decemberimi suliassanit 51-init 23-it suliarineqarsimapput, tassa 45 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissuteqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalackersuisunit suli eqqumaffigineqartariaqarpoq, missingersuusiormummi inatsit unioqqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Akileraartarnermullu Ataatsimiititaliamit kissaatigineqanngimmat.

Aalajangiiffigisassatut siuliassat pineqartut 36-it 2013-imeersut Aningaasaqarnermut Akileraartarnermullu Ataatsimiititaliamit ima amerlatigisoriarluni suliarineqarput:
Suliassat 30-t ataasiarluni suliarineqarput aammalu
Suliassat 6-it marloriarluni suliarineqarlutik.

Taamaalillutik Aningaasaqarnermut Akileraartarnermullu Ataatsimiititaliap aalajangiineratigut suliat tamarmik naammassillugit suliarineqarput.

Suliani nr. 13-623, 625, 627, 638, 639, 647 aamma 652-imi Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit **itigartinneqarput**, aamma takuuk isumaliutissiissummi immikkoortoq 11.4. Suliaq nr. 13-619-imi Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit suliariumaneqanngilaq. Suliat naammassineqartut sinnerini tamani Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit akuerineqarsimapput.

Suliani arlalinni Naalakkersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera suliat suussusiinik pissuteqartumik missingersuutitut ilanngussatigut² takussutissaqartinneqartanngikkaluortoq, sulianut 2010-mi Inatsisartut Aningaasaqarnermut Ataatsimiititaliaannit akuerineqartunut missingersuutitut ilanngussat pisariaqartut 2010-mut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermut Ataatsimiititaliamit oqaatigineqassaaq.

6. 2013-mi aningaasanut inatsit aamma 2013-mi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit

6.1 Kisitsisit pingaarnerit aningaasanngorlugit

2013-mi aningaasanut inatsimmi aamma 2013-mi ilassutitut aningaasaliissutitut inatsisissatut siunnersuummi kisitsisit pingaarnerit aningaasanngorlugit takussutissiarineqarnerat 2013-mi ilassutitut aningaasaliissutitut inatsisissatut Naalakkersuisut siunnersuutaata danskisuuani quppernemi 37 – 49-imi kalaallisuuani quppernemi 42 – 44-imi takuneqarsinnaapput, taakkulu innersuussutigineqarput.

Oqaatigineqassaarli aningaasaliissutitut allannguutit ilanngaattissat ilanngaatigereerlugit - 16,531 mio. kr.-inik aningaasartuuteqarnermik nalillit Aningaasaqarnermut Akileraartarnermullu Ataatsimiititaliamit 2013-mi akuerineqarmata (missingersuutitigut pitsanngoriaat). Kiisalu Suleriaaseq pillugu Inatsisartut Ataatsimiititaliaata aningaasaliissutitut allannguutit ilanngaattissat ilanngaatigereerlugit 6,203 mio. kr.-inik sunniuteqartussat aamma akuerai (missingersuutitigut

² Soorlu taamaappoq suliani isumaqatigiissuteqarnissamut imaluunniit Namminersorlutik Oqartussat illutaannik akiliutitaqanngitsumik kommunimut tunniussinissamut akuersinissamut Naalakkersuisunut ilaasortaq ataatsimiititaliamit piginnaatinneqarsimatillugu. Assersuutissaq alla tassaavoq suliaq 13-648, tamatumani qullersaqarfiup, Nykreditimit attartukkap, pisiarinissaanut Nukissiorfiit illikartitaminit 41,5 mio. kr.-inik atuinissaa ataatsimiititaliamit akuerineqarluni.

ajorseriaat). Tamatuma kingorna 2013-mi IST-kkut angusat **103,273** mio. kr.-inik **amigartoorfiusussatut** missingerneqarput. Matumani eqqaamasariaqarpoq *angusassatut missingersuutit* inaarutaasumillu *naatsorsuutitigut angusat* assigiinngimmata. 2013-mi inaarutaasumik naatsorsuutitigut angusat 2013-mi Nunatta Karsiata naatsorsuutaanni, Inatsisartut upernaakkut ataatsimiinneranni saqqummiunneqarlutillu siullermeerneqartussatut naatsorsuutigineqartumi takuneqarsinnaapput.

Aningaasaqarnermut Akileraartarnermullu Ataatsimiititaliap periarfissaq iluatsillugu erseqqissassavaa nunatta karsiata naatsorsuutai ima siusitsigisukkut naammassineqartassasut Inatsisartut upernaakkut ataatsimiinnerini taakku Inatsisartunut ilaasortanit ajornaquteqanngitsumik siullermeerneqarsinnaanngorlugit, tamatumalu kingorna Kukkunersiuineranut Ataatsimiititaliamit suliarineqartussatut innersuunneqassallutik, taamaalilluni taassuma naatsorsuutitik suliarinninnini ima siusitsigisukkut naammassisinnaalissallugu ukiakkut ataatsimiinnerup aallartinnissaa sioqqullugu ataatsimiititaliap isumaliutissiissutaa atsiorneqarsimalluni.

Kukkunersiuineranut Ataatsimiititaliap isumaliutissiissutaa tunngaviumik isigalugu piffissap taamaalinerani atsiorneqareerluni piareersimanissaanut pissutaavoq taamaaliornikkut Aningaasaqarnermut Ataatsimiititaliap naatsorsuutitut tunngasumik immikkut isornartoqartinneqartut, taakkunungalulu ilanngullugit atuinerrussuteqarfiusimasut atuinikinneruffiusimasullu pillugit paasisaqarnissaminut periarfissinneqarnissaa, tamatumani siunertarineqarluni pissutsit taamaattut isornartoqartinneqartut aningaasanut inatsisissatut siunnersuummi ukiakkut ataatsimiinnermi oqaluuserineqartussami ilannguteqqinneqannginnissaannik qulakkeerinninnissaq.

6.2 Illassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut

Inatsisissatut siunnersuummi ilaapput illassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Inatsisartut Aningaasaqarnermut Akileraartarnermullu Ataatsimiititaliaannit
- Inatsisartunut/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutitut takussutissiami*, inatsisissatut siunnersuummi *ilanngussaq 1-imi*, takuneqarsinnaapput. Allannguutit ataasiakkaat *missingersuutitut ilanngussartaqarput*, taakkunanilu allannguutit erseqqinnerusumik nassuiarneqarput. *Ilanngussaq 1-imi* taamatullu *missingersuutitut ilanngussani* takuneqarsinnaassaaq Aningaasaqarnermut Akileraartarnermullu Ataatsimiititaliaq Naalakkersuisulluunniit aningaasaliissutitik allannguisoqarnissaanik qanga akuersisimanersut suliarlu sorleq pineqarnersoq.

6.2.1 Naalakkersuisut oqaasertaliussamat innersuussillutik akuersissutigisaat

Oqaasertaliussat tunngavigalugit aningaasaliissutitik nuussinerit amerlasuut Naalakkersuisunit akuersissutigineqarput. Nuussinerit takku ilanngaattissat ilanngaatigereerlugit missingersuutitut sunnuteqanngillat. Ingerlatsineranut tunngasuni nuussinerit amerlanerpaartaat 2013-imi martsimi qinersinerup kingorna suliaasaqarfiit allanngornerinik pissuteqarput.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Akileraartarnermullu Ataatsimiititaliap erseqqinnerusumik naliliiffigisimavaa. Isumaliutissiissutit immikkoortuani 9.3-mi allassimasut innersuussutigineqarput.

6.2.2 Aningaasaqarnermut Akileraartarnermullu Ataatsimiititaliamit akuersissutigineqartut

Ingerlatsineranut aningaasaliissutit

Ingerlatsineranut aningaasaliissutinik allannguinerit ilanngaattissat ilanngaatigereerlugit 2,48 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput.

Tapiissutitut aningaasaliissutit

Tapiissutitut aningaasaliissutinik allannguinerit ilanngaattissat ilanngaatigereerlugit 129,519 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput.

Aningaasaliissutit inatsisitigut pisussaaffigisat

Kontomi pingaanermi 40.91.31-mi, suliniutit aallaavigalugit tapiissutinut tunngasuni, aningaasaliissutit amerlineqarnerat tunngavigalugu aningaasaliissutinik inatsisitigut pisussaaffigisamik allannguinerit ilanngaattissat ilanngaatigereerlugit 4,32 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput. Tamatuma saniatigut aningaasaliissutinik inatsisitigut pisussaaffigisamik allannguissamik akuersissuteqartoqanngilaq, tamannalu missingersuusiornermut inatsimmi § 27-imut naapertuuppoq

Isertitassatut aningaasaliissutit

Isertitassatut aningaasaliissutinik allannguissamik Aningaasaqarnermut Akileraartarnermullu Ataatsimiititaliaq 2013-mi ilanngaattissat ilanngaatigereerlugit -25,0 mio. kr.-inik sunnuteqartussamik akuersissuteqarsimavoq (missingersuutitigut pitsanngoriaat). Isertitassatut aningaasaliissutinik allannguisoqartillugu aningaasanut inatsimmi aningaasartuutissatut atugassiissutigineqartut Inatsisartut ataatsimoortumik pingaarnersiunerannik ersiutaanissaat sukkulluunniit aalajangiusimaneqartuartaqassaaq, tak. missingersuusiornermut inatsimmi § 5. Isertitassatut aningaasaliissutit allanngortinneqarnissaannik 2013-mi akuersineq tunngaviusumik maleruagassamut tassunga akerliusutut isikkoqanngilaq, tassa missingersuutitigut aningaasaliissutinik allannguinerinnaammat, tak. isumaliutissiisummi immikkoortoq alla.

Sanaartugassanut aningaasaliissutit

Sanaartugassanut aningaasaliissutinik allannguissamik qinnuteqaatit ilanngaattissat ilanngaatigereerlugit -127,85 mio. kr.-inik nalillit Aningaasaqarnermut Akileraartarnermullu Ataatsimiititaliamit akuersissutigineqarput (missingersuutitigut pitsanngoriaat).

6.2.3 Inatsisartut Suleriaaseq pillugu Ataatsimiititaliaannit akuersissutigineqartut (suliassaqarfik 01)

Ilassutitut aningaasaliissuteqarnissamik qinnuteqaatinik ilanngaattissat ilanngaatigereerlugit 6,203 muio. Kr.-inik nalillit Suleriaaseq pillugu Ataatsimiititaliap ukioq manna akuersissutigai. Taamaalilluni 2013-imi qinersinerup kingorna politikikkut partiimut nutaamut tapiissutinut, qinersinerup kingorna qinikkanut tunuartunut aammalu Inatsisartoqarfissap nutaap pilersaarusiornernanut aningasanik akuersissuteqartoqarpoq.

7. Oqaasertaliussamik allannguinerit (inatsisissatut siunnersuummi § 2)

Oqaasertaliussat arlalissuit inatsisissatut siunnersuummi ilanngunneqarsimapput. 2013-mi aningaasanut inatsimmi oqaasertaliussat taakku taamaaqqataat oqaasertaliussanit akuersissutigineqartunit taarserneqarput/ilassuserneqarput. 2013-imi qinersinerup kingorna oqartussaaffiit allanngortinneqarnerat oqaasertaliussanut amerlanerpaanut tunuliaqutaapput. Ataasiakkaalli nutaajupput aammalu Aningaasaqarnermut Akileraartarnermullu Ataatsimiititaliap akuersissuteqarnera tunuliaqutigalugu ilanngunneqarlutik.

Oqaasertaliussanut nassuiaatit tamakkiisuunnginnerat Aningaasaqarnermut Akileraartarnermullu Ataatsimiititaliap ukiut siuliini tikkuavigereepaa. Taamaakkaluartoq oqaasertaliussat missingersuusiortarnermut inatsit naapertorlugu inatsisip oqaasertarai, taamaattumillu inatsisit allat assigalugit inatsisitut paasiuminartuullutillu pitsaassuseqarnissaannik qulakkeerinissamik minnerpaamik piumasaqarfiusariaqarlutik. Tamanna Naalackersuisunit - pingaartumillu Inatsisartunit - eqqumaffiginiarneqartariaqarpoq. Taamaakkaluartoq inatsisissatut siunnersuutip matuma siullermeerneqarnerani oqaasertaliussat imarisaat partiit oqaaseqartartuisa arlaannaannilluunniit oqaaseqarfigineqanngillat, tamannali oqaasertaliussat ilusilersorneqarnerannik imarisaannillu nalinginnaasumik naamagisimaarinninnertut imaangilaq paasineqassasoq.

Tamatuma saniatigut oqaasertaliussat allanngortinneqarnissaannik qinnuteqarnissaq *sooq* pisariaqarnerasoq pillugu paasissutissat ersarissut nassuiaatini saqqummiunneqartariaqarnerat erseqqissassallugu ataatsimiititaliap pisariaqarsora. Pisut amerlanerpaartaanni paasissutissat taakku amigaataapput.

8. Sillimmatinut kontonit 20.11.50-imit aamma 20.11.52-imit atugassiissutiginninnerit

2013-mut aningaasanut inatsit kontomi pingaarnermi 20.11.50-imi ingerlatsinerumt sillimmatinik 10,0 mio. kr.-inik ilaqartillugu akuersissutigineqarpoq. Ingerlatsinerumt sillimmatit tigusiffigineqarnissaat/ilaneqarnissaat 2013-mi sisamariarluni akuersissutigineqarsimavoq, tamatumalu kingorna 31. december 2013-mi konto pingaarnermi 0 kr.-it sinnerussimallutik. Taamaalillutillu ingerlatsinerumt sillimmatit ilanngaasereerluni 10,0 mio. kr.-inik 2013-imi tigusiffigineqarsimapput. Tassunga atatillugu oqaatigineqassaaq kontomi pingaarnermi aningaasanik atugassiinissaq Aningaasaqarnermut Akileraartarnermullu Ataatsimiititaliamit arlaleriarluni itigartitsissutigineqarsimammat.

Assersuutitut taaneqarsinnaavoq 2012-mut aningaasanut inatsit aammattaaq 10,0 mio. kr.-inik ingerlatsinerumt sillimmatitaqartillugu akuersissutigineqarmat. Ingerlatsinerumt sillimmatit tigusiffigineqarnissaat/ilaneqarnissaat 2012-mi pingasoriarluni akuersissutigineqarsimavoq, tamatumalu kingorna kontomi pingaarnermi 31. december 2012-mi 2,0 mio. kr.-it sinnerussimallutik.

Kiisalu 2013-mut aningaasanut inatsit suliffissaaleqisut aammalu inuusuttut ilinniartitaanerup avataaniittut immikkut ittumik iliuseqarfigineqarnissaannut atugassaanik immikkut sillimmatinik 36,5 mio. kr.-inik ilaqartillugu akuersissutigineqarpoq. Aningaasat kontomi pingaarnermi 20.11.72-imi immikkoortinneqarput aammalu 2013-imi januarip naanerani tamakkiisumik atugassiissutigineqareerlutik.

Sillimmatinut kontonit aningaasalersugaasunik suliniutinik nutaanik piviusunngortitsinerup aallartitsinerullu missingersuusiortarnermut inatsimmi § 5, ukiumi aningaasanut inatsiseqarfiusumi Inatsisartut aningaasaqarnermik ataatsimoortumik tullerriaarinerannik aningaasanut inatsisip

ersersitsisuunissaanik aalajangersaasoq, naapertorlugu pinissaa pingaaruteqarpoq. Taamatut ataatsimoortumik tullerriaarinermut taarsiullugu atorneqarsinnaavoq “ingerlaavartumik tullerriaarineq”, taannali *tullerriaarineruinngilaq*, tassaallunili inuiaqatigiit aningaasaatannik nalaatsortumik pitsaanerpaajunngitsumillu atuineq. Tamannarpiarlu pissutigalugu ingerlatsinermut aningaasartuutunik ataasiakkaanik qaffaanissaq imaluunniit ataatsimoortumik pilersaarutit avataasigut sanaartornermi suliniutunik ataasiakkaanik aallartitsinissamik (aalajangiiffigisassatut) siunnersuutunik ataasiakkaanik akuersinissaq Inatsisartut *mianersuutigiuartariaqarpaat*.

Tamatuma saniatigut Namminersorlutik Oqartussat aqutsivianni piviusorsioortumik missingersuusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqqullugu sillimmatitut aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat ukiut siuliinisulli Aningaasaqarnermut Akileraartarnermullu Ataatsimiititaliamit oqaatigineqassaaq.

9. Naalackersuisut nuussinernut Aningaasaqarnermut Akileraartarnermullu Ataatsimiititaliap oqaaseqaatai

9.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Akileraartarnermullu Ataatsimiititaliamit kingusinnerusukkut akuersissutigineqartut 2013-milu ilassutitut aningaasaliissutinut inatsimmi ilanngunneqartut naapertorlugit kontot pingaarnerit assigiinngitsut kiisalu sanaartornerup iluani suliassat akornanni nuussinissanut Naalackersuisut piginnaatinneqarput.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa inatsisissatut siunnersuummi aningaasaliissutinut takussutissiap, ilanngussaq 1-ip, immikkoortortaani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalackersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

Missingersuutinut ilanngussat taakku Aningaasaqarnermut Akileraartarnermullu Ataatsimiititaliap misissorpai, tamannalu tunngavigalugu missingersuutinut ilanngussat paasissutissiilluartuunissaasa qulakkeerneqarnissaanik pingaartitsinerminnik ingerlatsiinnarnissaanik Naalackersuisut kaammattorlugit. Tamanna minnerunngitsumik atuuppoq oqartussaaffiit allanngortinneqarnerinnaannit allaanerusumik nuussisoqartillugu.

9.2 Aalajangersimasunut oqaaseqaatit

9.2.1 Sulisorisat pillugit paasissutissat

Allannguutissatut akuersissutigineqartuni *Sulisorisassatut naatsorsuutigisat*-nut kinguneqaatissaat pillugit paasissutissat tutsuiginartut amigaatigineqarnerat Aningaasaqarnermut Akileraartarnermullu Ataatsimiititaliamit ukiut siuliini uparuarneqartarpoq. Pisut ilaanni paasissutissat taakku amigaataalluinnartarput, ilaannilu *sulisorisatigut allannguutit pinnagit* atorfiit allannguutaat aalajangersimasut nalinginnaasumik paasissutissiissutigineqartarsimallutik.

Missingersuusiortarnermut malittarisassami 2008-meersumi immikkoortoq 5.2 Aningaasaqarnermut Akileraartarnermullu Ataatsimiititaliamit aamma innersuussutigineqassaaq, tassani sulisorisassatut

naatsorsuutigisat taakkulu naatsorsorneqartarnerat pillugit paasissutissiisuteqarnissamut Naalakkersuisut najoqqutassanik pitsaalluinnartunik aalajangersaasimapput.

Tamanna tunngavigalugu ilassutitut aningaasaliissutitut ukiup siuliani inatsisissatut siunnersuut taamatut amigaateqarsorinangitsoq paasillugu iluarisimaarnarpoq.

Sulisorisassatut naatsorsuutigisat pillugit paasissutissat eqqortuunerat tunngavissaatillugu 2013-mi aningaasanut inatsimmi takussutissiat *sulisorisassatut naatsorsuutigisat* pillugit paasissutissanik imallit nutarterneqarsinnaapput. Taamaaliornikkut 2013-mi naatsorsuutininik tunniussinermut atatillugu *Sulisorisassatut naatsorsuutigisat sulisorisatut atorneqarpiartunut* sanilliunneqarnissaat periarfissaqalissaaq. Kukkunersiuinermut Ataatsimiititaliaq nunatta karsiata 2013-imut naatsorsuutaanik suliaqarnerminut atatillugu taamatut sanilliusseqqullugu Aningaasaqarnermut Akileraartarnermullu Ataatsimiititaliamit kaammattorneqarpoq. Assersuutigalugu Inuussutissarsiornermut Aatsitassarsiornermullu Naalakkersuisoqarfimmi aalajangersimasumik sulisorisat atornagit siunnersortininik avataaneersunik atuinerup misissorneqarnissaanik Aningaasaqarnermut Ataatsimiititaliaasimasumit Kukkunersiuinermullu Ataatsimiititaliamit ukiuni arlalinni kissaatigineqarsimasup ingerlateqqinneqarnissaanik Kukkunersiuinermut Ataatsimiititaliaq taamaalilluni tunngavissaqarlualissaaq.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutitut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat Aningaasaqarnermut Akileraartarnermullu Ataatsimiititaliap ukioq manna aammaarluni **siunnersuutigissavaa**. Taamaalilluni oqariaaseq ukioq naallugu sulisoriat eqqornerusutut isigineqarpoq, soorlutaaq sulisorisassatut naatsorsuutigisat aalajangersimasumik atorfitut paatsoorneqarlutik paasineqarsinnaanerat killilerneqassasoq.

9.2.2 Naalakkersuisut kingumoortumik atuutilersumik nuussinissanik akuersissutiginninnerat

Malittarisassatut pingaarnertut isigalugu kingumut atuutilersussanngorlugit nuussinissat akuersissutigineqartannginnissaat, taamaattoqartillugulu aningaasat atorneqareerneranni akuersissutiginnittoqartannginnissaa qulakkeerneqartassasoq Aningaasaqarnermut Akileraartarnermullu Ataatsimiititaliap Naalakkersuisunut ukiut siuliini ilassutitut aningaasaliissutitut inatsisunik suliaqarnermut atatillugu kaammattuutigisarpaa. Taamaalillunilu missingersuutininik qaangiinissaaq taama ersaritsigitillugu ukiumi aningaasanut inatsisip atuuffiata naalernerani nuussinierit ingerlanneqartariaqanngillat. Tassunga taarsiullugu missingersuutininik qaangiinermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqartariaqarpoq.

Ukiup ingerlanerani nuussinierit ilarpassui, oqaasertaliussami piginnaatitsissut aqputigalugu Naalakkersuisunit akuerineqartut, 1. januar 2013-imi kingumut atuutilersussatut akuerineqarput, nuussinierilli taakku oqartussaaffiit allanngorneqarnerannut atatillugu naatsorsuutininik pissuteqartumik pimmeta siuliani allassimasumut atatillugu ajornartorsiutitaqanngillat.

Nuussinermut pitsaavallaanngitsumut assersuutaasinnaavoq ulloq 2. decemberimi 2013-imi pisoq, tamatumani peqqinnissaqarfiup kontoisa pingaarnierit akornanni katillugit 3,5 mio. kr.-it konto pingaarniermit 34.12.01-imit, nunap immikkoortuini peqqinnissaqarfimmi nakorsanik sullinneqarnermut tunngasumit, konto pingaarniermit 34.11.03-mut, Dronning Ingridip Napparsimmavissuanut tunngasumit, aammalu konto pingaarniermit 34.13.01-imut,

peqqinnissaqarfinni kigutigissaanermut tunngasumut, nuunneqarlutik. Taamatut nuussinermut tunngavigineqartoq pillugu missingersuutitut ilanngussani paasissutissat amerlagisassaangilluinnarput. Assersuutigalugu kontomut pingaarnermut 34.11.03-mut, Dronning Ingridip Napparsimmavissuanut tunngasumut, missingersuutitut ilanngussami allassimavoq *“atuivallaarneq ilaatigut peqquteqarpoq sulisorisanut inissianut aningaasartuuteqarnerulerneq kiisalu illutat iluarsaanneqarnerinut aserfallatsaalineqarnerinullu aningaasartuuteqarnerulerneq”*. Atuinerunermulli tamakkiisumik nassuiaatissat pigineqanngillat – sulilu ajornaneruvoq siunissami ajornartorsiutit taamaattut pinngitsoortinniarlugit qanoq iliornialersaarneq pillugu allassimasoqanngimmat.

Tamanna tunngavigalugu kontot pingaarnertit erseqqilluinnartumik qaangiiffiusussat nunatta karsiata naatsorsuutaasa kusassarneqarnissaat siunertariinnarlugu aningaasaliissutitut ukiup naalernerani nuussiffigineqartannginnissaannik Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput**. Missingersuusiornermut inatsit naapertorlugit aningaasaliissutitut qaangiinissap (taamaalillunilu inatsimmik unioqqutitsinissap) pinngitsoortinniarnissaanut Naalakkersuisut pisussaaffeqarnerat, taamaalillutillu aningaasaliissutitut atuivallaarnissaq pinngitsoorniarlugit oqaasertaliussani nuussinissamut piginnaatitsissutitut Naalakkersuisut atuinissaat ataatsimiititaliamit soorunami akuersaarneqarpoq. Ukiulli naalernerani taama nuussinerit immikkoortortani aningaasaqarnermik aqutsinerup nunatta karsiata naatsorsuutaani eqqortumik takutinneqanngitsoorneranut peqataaqataasinnaapput, taamaaliornikkullu aningaasaqarneq piffissaagallartillugu iliuseqarfigineqanngitsoorluni. Tamatuma saniatigut naatsorsuutitut taama kusassaanerup nassatarisarpaa nunatta karsiata aningaasaataanik ukiumut aggersumut aningaasanut inatsisissamut Inatsisartut missingersuusiorneriisa pingaarnersiullutillu tullerriarinerisa pisariunerulerneru. Taamaattumik pisuni taamaattuni aningaasaliissutitut nuussinnaatitaanerminnik Naalakkersuisut atuinaveersaartariaqartut tassungalu taarsiullugu nuussinissaq pillugu qinnuteqaammik Aningaasaqarnermut Akileraartarnermullu Ataatsimiititaliamut saaqummiussisariaqartut Aningaasaqarnermut Akileraartarnermullu Ataatsimiititaliaq isumaqarpoq.

9.3 Naalakkersuisut aningaasaliissutitut nuussineranni inatsisitigut tunngavissat

Inatsisitigut tunngavissaatitat naapertorlugit Naalakkersuisut nuussineri pisimanersut Aningaasaqarnermut Akileraartarnermullu Ataatsimiititaliamit erseqqinnerusumik naliliiffigineqarsimavoq. Immikkoortoq 9.3.1-imi allassimasut nangaassuteqarfigineqarsinnaanerit eqqaassanngikkaanni ataatsimut isigalugu pissutsinik tamatumunnga naapertuutinnigitsunik ataatsimiititaliaq nalaataqarsimanngilaq.

9.3.1 Naalakkersuisut ulloq 31. januar 2013-imi nuussinerat

2013-imi aningaasanut inatsimmi konto pingaarnerp 66.01.02-p, Aatsitassanut Aqutsisoqarfimmi allaffissornermut tunngasup, ataani oqaasertaliussat ilanngunneqartut nuunneqarnissaat Naalakkersuisunit ulloq 31. januar 2013-imi akuerineqartoq ilassutitut aningaasaliissutitut inatsisissatut siunnersuummi allassimavoq. Oqaasertaliussaq tassungalu nassuiaatit konto pingaarnermut 64.01.06-imut, geologimut pilerisaarinerimullu suliniutitut tunngasumut, nuunneqarput.

Nuussinermut tunngavigineqartoq tassaanerarneqarpoq 2013-imi aningaasanut inatsimmi sulissaqarfik 10-89-imut oqaasertaliussaq nr. 1. Oqartussaaffinnik allannguinerimut atatillugu aningaasaliissutitut oqaasertaliussanillu nuussinissamut Naalakkersuisut oqaasertaliussakkut tunngavissinneqarput.

Oqaasertaliussamik nuussinerup inatsisinut naapertuuttumik pisinnaanerani 2013-imi januarimi taassumaluunniit nalleriartornerani oqartussaaffinnik allannguisoqarneranut uppernarsaataasunik taamaattoqannginneranilluunniit takutitsisunik suliame paasissutissanik Aningaasaqarnermut Akileraartarnermullu Ataatsimiititaliaq tigummiaraqanngilaq. Matumanili oqaatigineqaannarsinnaavoq oqartuusaaffinnik allannguinuq taamaattoq pisimasinnaammatt.

Qularnaatsumilli oqaatigineqarsinnaavoq oqaasertaliussamut nr. 2-mut nassuiaat AI 2013-imi ilanngunneqartumut sanilliulluni 2013-imi ilassutitut aningaasaliissutinut inatsisissatut siunnersuummut ilanngunneqartumi *allangortinneqarsimammatt*, tassami immikkoortut aappanni oqaaseqatigiittut kingullertut uku ilanngunneqarsimammata *"Missingersuusiortarnermut inatsimmi "ilangaateqarani tunngavigisaa"*, § 4, imm. 3 *naapertorlugu kontomut pingaarnermut matumunnga sanioqqunneqarsinnaavoq*".³ Oqaasertaliussaq nassuiaatitani taama ilassuserlugu kingusinnerusukkut AI 2014-imut ilanngunneqarpoq.

Tamatuma saniatigut allassimavoq *"Allaatigisatut ilanngussaq nutaajuvoq*, tamannalu eqqumiiginarpoq, tassami oqartussaaffiit allanngornerini aningaasaliissutinik oqaasertaliussanillu *nuussinissamut* tunngavissaq innersuussutigineqartoq taamaallaat tunngavissiimmat. Akerlianik oqaasertaliussanik nutaanik allanngukkanilluunniit pilersitsinissamut tunngavissiisoqanngilaq. Allassimasulli qanoq paasineqarnissaat qularnaatsumik oqaatigineqarsinnaanngilaq, allassimasutigummi innersuussutigineqaannarsimasinnaammatt oqaasertaliussaq *kontomut pingaarnermut tassunga* atatillugu nutaajuvoq. Taamaattoqarsimappalli assersuutigalugu ima allannissaq naapertuunnerusimassagalarpoq *"Oqaasertaliussaq oqartussaaffinnik allannguinerup kingunerisaanik kontomit pingaarnermit 66.01.02-mit ingerlatseqqitaavoq"*. Taamatut aaqiineq oqaasertaliussanut allannut oqartussaaffinnik allannguinerit pissutigalugit nuunneqartunut nalinginnaasumik toqqarneqarsimavoq.

Ataatsimut isigalugu oqaasertaliussaq nr. 2-mut nassuiaatip annertusineqarnera naammattumik tunngavissaqarnani pisimasorinarpoq.

Tamakku saniatigut ilanngaatisat ilanngaatigereernagit periutsip missingersuusiortarnermut inatsimmi aalajangersarneqartup saneqqunneqarnissaanut piginnaatitsissutip oqaasertaliussamut *nassuiaatini* allanneqarnera naapertuuttutut isigineqarsinnaagunannngilaq. Inatsisiliortarnerup tungaanit isigalugu – naatsumik oqaatigalugu – inatsimmut (imaluunniit oqaasertaliussamut) *nassuiaatini* immikkut inatsisiliortoqarsinnaanngilaq. Kontoli pingaarneq una imaluunniit

³ *Missingersuusiortarnermut inatsimmi § 4, imm. 3-mi ima allassimavoq: "Aningaasanut inatsit ilanngaatisat ilanngaatigereernagit periuseq malillugu sularineqartassaaq. Aningaasartuutissatut aningaasaliissutit isertitassaqarnerussutinut amerlaqataannut innersuussinikkut sinnerneqartassanngillat, taamaattorli takukkit §-it 7 aamma 15."* Aalajangersakkamut nassuiaatini ilaatigut makku paasissutissiissutigineqarput: " .. aalajangersakkami aalajangersarneqarpoq aningaasaliissuteqariaatsimi aallaaviusoq tassaasoq aningaasaliissutit aningaasartuutit isertitallu immikkut nalunaarsorneqartarnerat (ilanngaatisat ilanngaatigereernagit periuseq). Taamaalillutik aallaaviusumik aningaasartuutitut aningaasaliissutit amerlaqataannik isertitaqarneq innersuussutigalugu sinnerneqarsinnaanngillat. Tassa imaappoq aningaasaliissutit ilanngaatisat ilanngaatigereernagit aningaasartuutitut ilanngaatisallu ilanngaatigereernagit isertitatut nalunaarsorneqartassasut."

aningaasaliinermi siunertat eqqarsaatigalugit missingersuusiortarnermut inatsimmi ilanngaatisat ilanngaatigereernagit periutsip avaqunneqarnissaanut aatsitassanut inatsimmi immikkoortumulluunniit inatsimmi ataatsimiititaliap suliassa qarfiata avataaniittumi allami immikkut tunngavissamik Aningaasaqarnermut Akileraartarnermullu Ataatsimiititaliap peqannginnerarsinnaanngilaa. Taamaattoqarsimappat oqaasertaliussa q tassungalu nassuiaatit immikkut tunngavissamut tassunga aalajangersimasumut innersuussuteqarsimassagaluarput.

Taamaakkaluartoq AI 2014-imi kontomut pingaarnermut 64.01.06-imut missingersuutinut ilanngussami paasissutissat ilanngunneqartut aamma naapertorlugit isumaqarnarpoq aningaasaat annertungaatsiartut ilanngaatisat ilanngaatigereernagit periutsimik saneqqutsisinnaaneq taanna aqquutigalugu Inatsisartut aningaasanut inatsimmi aningaasanik ukiumoortumik tullerriaarisarnerat avaqqullugu annertunerusumik annikinnerusumilluunniit ingerlanneqarsinnaasut pineqartut. Taamaattumik suliap tamarmiusup sukumiinerusumik misissorneqarnissaa pissusissamisoorsorineqarpoq. Tamanna tunngavigalugu Kukkuersiunermit Ataatsimiititaliap nunatta karsiata 2013-imut naatsorsuutaanik suliqaqarnerminut atatillugu suliamik tamatumingga sukumiisumik misissueqqullugu Aningaasaqarnermut Akileraartarnermullu Ataatsimiititaliamit **qinnuigineqarpoq**. Kaammattuutigineqassaaq taamatut misissuinermit konto pingaarnaq matumani pineqartoq kisimi misissuiffigineqassanngitsoq, tamatumani aamma nalilerneqassasoq missingersuusiortarnermut inatsimmi § 4, imm. 3 tunngavik suliassa qarfimmi tamarmiusumi missingersuusiortarnermit aningaasartuuteqartarnermilu malinneqarnersoq.

10. Aningaasaqarnermut Akileraartarnermullu Ataatsimiititaliap inatsisissatut siunnersuummut oqaatigiumasai allat

10.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 5 innersuussutigineqarpoq, tassani suliap amerlassusiat, qinnuteqaatinik Aningaasaqarnermut Akileraartarnermullu Ataatsimiititaliap sularinninnerata inernerit naapertorlugit agguataakkamik nalunaarsorneqarsimallutik.

Tamatuma saniatigut ilanngussa A innersuussutigineqassaaq, tassani Aningaasaqarnermut Ataatsimiititaliap ukiumi qaangiuttumi aalajangigai tamakkerlutik suliap normukkaarlugit ilangunneqarsimapput. Aalajangiinerni arlalinni annertunerusumik paasissutisseeqqullugit missingersuutinulluunniit ilanngussamik nutaamik nassiusseqqullugit Naalakkersuisut ataatsimiititaliamit qinnuigineqarsimapput. Taakkuttaaq pisariaqartillugu aalajangiinernut ataasiakkaanut kingullinngorlugit ilanngunneqarput. Missingersuutinut ilanngussat tamakkiisuunissaannik, taamaalillutillu taakku atortussanik allanik soorlu Naalakkersuisut isummernissaannut tunngavissianik allanillu atortoqarani atuarneqarsinnaasuunissaannik, Naalakkersuisut eqqaasinneqarnissaat ataatsimiititaliamit pisariaqartutut isigineqarpoq.

Taamatuma saniatigut ilaatigut ilusiligaanermikkut inissitsiterneqarnermikkullu assigiissarneqarnissaasa kiisalu aningaasaliissutinut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutinut ilanngussat ilassutitut aningaasaliissutinut inatsimmi ilanngunneqannginneranni Naalakkersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq. Inatsisissatut siunnersuutip Naalakkersuisuneersup pitsaasuunera sukumiisumik misissorneqarsimassasoq naatsorsuutigineqartariaqarpoq.

10.1.1 Sillimaffiginninnaasimanninnissamik inatsimmi piumasqaat

Ataatsimut isigalugu ukiumi qaangiuttumi aningaasaliissuteqarnissamik suliassat tunngavigalugit missingersuusiornermut inatsimmi § 28, imm. 2-p ataqqineqarnissaata erseqqissarneqarnissaa pisariaqarsorinarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allannortitsisoqarnissaanik qinnuteqaatit taamaallaat aningaasaqarnikkut iliussissanut *pingaarutilinnut* aammalu aningaasanut inatsisissap suliarinerani *sillimaffigereerneqarsinnaasimannigitsunut* tunngasuusassasut.

Nassuerutigineqartariaqarporli 2013-mi aningaasaliissuteqarnissamik suliassanut arlalinnut tunngatillugu aalajangersagaq taaneqartoq pisariaqarneratut tamakkiisumik malinniarneqarsimanersoq nalorninarmat. Suliassat taakku isumaliutissiisummi matumani immikkoortoq 11.1-ip ataami ataatsimiititaliap oqaaseqarfigissavai.

11. 2013-mi aningaasaliissuteqarnissamik suliassanut ataasiakkaanut oqaaseqaatit

11.1 Kommunini qineqqusaarnernut tapiissuteqarnissamik qinnuteqaatit marluk (13-619 aamma 13-639)

Ulloq 31. januar 2013 Inatsisartunut qinersinissaq nalunaarutigineqarpoq. Taamaalillutillu taamani Naalakkersuisuusut naalakkersuisuugallartutut atuutilerput. Taamaattoqaraluartoq politikikkut partiit arlallit kommuninut ulloq 2. april 2013-imi qinersinissamut qineqqusaarnissaannut tapiissuteqarnissamut qinnuteqaat ulloq 1. februar 2013-imi Aningaasaqarnermut Akileraartarnermullu Ataatsimiititaliamut nassiuunneqarpoq. Qinnuteqaat taanna Aningaasaqarnermut Akileraartarnermullu Ataatsimiititaliamit ulloq 4. februar 2013-imi tiguneqarpoq.

Arlalinnik pissuteqartumik qinnuteqaatip taassuma suliarineqarnissaa Aningaasaqarnermut Akileraartarnermullu Ataatsimiititaliamit itigartinneqartariaqarsimavoq.

Ilaatigut paasineqarpoq qinnuteqaat Inatsisartut Naalakkersuisullu pillugit Inatsisartut inatsisaanni § 29-mi aalajangersakkanut ersarilluinnartumik naapertuutinngitsoq. Aalajangersakkami allassimavoq Naalakkersuisuugallartut atorfimmi suliassat ingerlaannarnissaannut pisariaqartunik taamaallaat suliaqarsinnaasut. Aalajangersakkamut nassuiaatini allassimavoq pissutsit taamaanneranni naalakkersuinikkut suliniutinik nutaanik aallartitsisoqassanngitsoq suliniutillu ingerlareersut qineqqusaalernermut qineqqusaarnermulluunniit ilaasutut salliutinniarneqartutut isigineqarsinnaasumik aamma ingerlanneqassanngitsut. Naalakkersuinikkut tunngavik pingaarutilik Naalakkersuisut aqutsiviannit nalinginnaasumik ilisimaneqartariaqartoq aalajangersakkakut ersersinneqarpoq. Taamaassimanngippat naalakkersuinikkut tunngaviit nalinginnaasut naleqquttumik pikkorissartitsinikkut qitiusumik allaffeqarfimmi ilisimaneqalernissaat qulakkeerneqassasoq ataatsimiititaliamit kaammattuutigineqarpoq.

Tamatuma saniatigut ersarilluinnarpoq qinnuteqaat missingersuusiortarnermut inatsimmut naapertuutinngitsoq, tassa aningaasaliissuteqarnissamik kissaat pisariaqartitsinerluunniit siumut naatsorsuutigineqarsinnaasimannigitsaq oqaatigineqarsinnaanngimmat. Taamaalillunilu 2012-ip naajartorerani aningaasanut inatsisissap akuersissutigineqarnerata nalaani tamakkiisumik ilisimaneqarpoq 2013-imi kommuninut qinersisoqartussaasoq.

Aammalu isummernissamat tungavissiaq Aningaasaqarnermut Naalackersuisoqarfimmut tusarniaassutigineqanngitsoq qinnuteqaat Aningaasaqarnermut Akileraartarnermullu Ataatsimiititaliamut nassiunneqarsimavoq, tamannalu Aningaasaqarnermut Ataatsimiititaliap ukiut ingerlaneranni piunasaqaatisarsimasaanut ersarilluinnartumik akerliuvoq. – Aammalu missingersuusiortarnermut malittarisassanik 2008-meersunik toqqaannartumik unioqqutitsinerulluni.

Tamatuma saniatigut oqaatigineqassaaq Inatsisartunut qinersinissamik nalunaarutiginnittoqarsimatillugu Inatsisartut Naalackersuisullu pillugit Inatsisartut inatsisaanni § 29 naapertorlugu ataatsimiititaliap sulinissanut maleruagassiisunik Aningaasaqarnermut Akileraartarnermullu Ataatsimiititaliap suleriaasiani immikkut aalajangersagaqarmat.

Aningaasaqarnermut Akileraartarnermullu Ataatsimiititaliap ajoraluartumik aatsaat taamatut nalaataqanngilaq. Aamma 2009-mi Inatsisartunut qinersinissap nalunaarutigineqarnerata kingorna iliuusissanut naalackersuisuugallartunit iliuuserineqarsinnaasutut inatsisitigut piunasaqaatinut tungavinnullu naapertuutinningsunut taamani Naalackersuisuugallartut qinnuteqaammik nassiussipput.

Suliaq siuliani allassimasoq februar 2013-imeersoq nuannerpallaanngitsumik september 2013-imi ilaneqaqqippoq, tassa partiit kommuninut qinersinermi qineqqusaarnissaannut tapiissuteqarnissamat qinnuteqaat Naalackersuisunngortunit nassiuteqqinneqarmat.

Naalackersuisut isummernissamat tungavissiami - qinnuteqaatip akuerineqarnissaanut tungavigineqarsinnaasutuutut – oqaatigaat Inatsisartunut qinersinerup kingorna amerlanerussuteqartut allanngorsimasut, taakkulu aallaavittut isigalugu aningaasanut inatsimmut atuuttumut sunniuteqarnissamat periarfissinneqartariaqartut. Nutaamik aningasaliissuteqarnissamik qinnuteqaatini pissutsit piffissami aningaasanut inatsisip akuersissutigineqarnerani naatsorsuutigineqareersinnaasut ilanngunneqartannginnissaannik piunasaqarfiusumik missingersuusiortarnermut inatsimmi aalajangersakkamat nassuiaammut atatillugu taama isumaqarneq – tupinnaannartumik – oqaatigineqarpoq.

Qinnuteqaat taanna nutaaq Aningaasaqarnermut Akileraartarnermullu Ataatsimiititaliamit soorunami isumaqatigiittumit itigartinneqarpoq, taamatummi isumaqarneq missingersuusiortarnermut inatsimmi aalajangersakkat eqqarsaatigalugit *attuumassuteqanngimmat*. Nutaamik aningasaliissuteqarnissamik aningaasaliissutinillunniit allannguissamik qinnuteqaatini pissutsit piffissami aningaasanut inatsisip akuersissutigineqarnerani naatsorsuutigineqareersinnaanngitsut kisimik ilanngunneqarsinnaasut missingersuusiortarnermut inatsimmi allassimasoqarnera qinersinissamik nalunaarutiginninnerup allanngortissinnaanngilaa. Siulianilu oqaatigineqareersutut 2013-imi kommuninut qinersisoqassasoq Inatsisartuni partiinit tamanit 2012-imi ukiakkut ilisimaneqarpoq. Naalackersuisunik nutaanik qinersinerup tamanna allanngortissinnaanngilaa. Inatsisit sunaluunniit Inatsisartut nutaanik akuersissutiginninnissaasa tungaannut atuuttarpoq. – Tamanna aamma aningaasanut inatsimmut atuuppoq.

Sulianut siulianut allassimasunut pingasunut tungatillugu oqaatigineqartariaqarpoq qinnuteqaatit ersarilluinnartumik unioqqutitsisut – politikerinit atorfilittalinnillunniit – qisuariarfingineqaratik Aningaasaqarnermut Akileraartarnermullu Ataatsimiititaliamut nassiunneqarnerat Namminersorlutik Oqartussanut **kanngunarsaataallunilu tatiginarsaataanngimmat**. Qinnuteqaatit taakku suliarinissaannik itigartitsisinini Aningaasaqarnermut Akileraartarnermullu Ataatsimiititaliap tanngassimaarutigissallugu pissutissaqarpoq. – Itigartitsinermi pivoq pisuni taakkunani marlunni ataatsimiititaliamut ilaasortat qinnuteqaatinik taakkuninnga akuersissutiginninnissaq naalackersuinerup

tungaani isigalugu soqutigisinnaagaat oqaatigineqarsinnaagaluartoq. Tamatumali saniatigut naalakkersuinikkut allaffissornikkullu periaatsini aqqissuussaaniikkut tunngaviummik sanngiiffeqarnersoq ileqqorissaarnissarlunniit eqqarsaatigalugu amigaateqarnersoq Aningaasaqarnermut Akileraartarnermullu Ataatsimiititaliaq imminut aperinissaanut suliat taakku tunngavissippaat.

Tamanna tunngavigalugu Inatsisartunut qinersinissamik nalunaaruteqartoqarsimatillugu Aningaasaqarnermut Akileraartarnermullu Ataatsimiititaliap oqartussaaffia pillugu inatsisitigut aalajangersakkat tunngavissallu immikkut ittut allatseqarfimminnut erseqqissaatigeqqullugit Naalakkersuisut Aningaasaqarnermut Ataatsimiititaliamit **kaammattorneqarput**, taamaalilluni Inatsisartunut tullianik qinersinissamik nalunaaruteqartoqarnerata kingorna qinnuteqaatit ersarilluinnartumik unioqutitsisut Aningaasaqarnermut Akileraartarnermullu Ataatsimiititaliamut saqqummiunneqaqqunagit. Iliuserequsat pissutsillu inatsisinut atuuttunut naapertuutinngitsut itigartinnissaannut kikkullunniit – politikeriugunik atorfilittaagunillunniit – pisinnaatitaaginnaratik pisussaaffeqarnerat tamanut erseqqissarneqartariaqarpoq. Inuiaqatigiinni inatsisit malillugit ingerlasuni inatsit politikimit salliuvoq!

Isumaliutissiisummut matumunnga allakkiat marluk ataatsimiititaliamit ilanngussaq B-tut ilanngunneqarput, taakkunani inatsisitigut maleruagassat tunngaviillu attuumassutillit allaaserineqarput. Allakkiat imaannik Naalakkersuisut Naalakkersuisullu allaffeqarfii misissuissasut ataatsimiititaliamit naatsorsuutigineqarpoq, taamaaliornikkut taakku siunissami taamatut pisoqaqqinnginnissaanut peqataaqataasinnaaqullugit.

Qinersinissamik tulliani nalunaaruteqarnermi aningaasaliissuteqarnissamik qinnuteqaatinik siuliani allasimasutut ittunik Aningaasaqarnermut Akileraartarnermullu Ataatsimiititaliamut nassiuussisoqassanngitsoq siunnersuutip matuma aappassaaneerneqarnissaanut akissuteqaamminni uppersaqqullugu Naalakkersuisut Aningaasaqarnermut Akileraartarnermullu Ataatsimiititaliamit **qinnuigineqarput**. Taamatut pissusilersornerup uteqqinneqannginnissaata Naalakkersuisunit Inatsisartunillu assammissutigineqarnissaa Aningaasaqarnermut Akileraartarnermullu Ataatsimiititaliamit assorsuaq pingaartinneqarpoq.

11.2 Dundasimi avatangiisit ajoquserneqarnissaat pinngitsoortinniarlugu iliuuseqarnissaq pillugu allaffissornikkut kukkusimanermik iluarsineq (13-620)

Kontomi pingaarnermi 87.75.02-mi, Dundasimi avatangiisit ajoquserneqarnissaat pinngitsoortinniarlugu iliuuseqarnissamut tunngasumi, aningaasaliissutit 25 mio. kr.-inik ikilineqarnissaat Naalakkersuisut qinnuteqaammi matumani pineqartumi kissaatigaat. Konto pingaarnerp aamma suliassap 2011-mi pilersinneqarneranni Aningaasaqarnermut Akileraartarnermullu Ataatsimiititaliap aalajangiineranut atatillugu Naalakkersuisut allaffissornikkut kukkunerata iluarsineqarnissaa siunertaavoq (Suliaq 11-562). Taamani suliama aningaasaliissutit 2011-mi 25 mio. kr.-inik amerlineqarnissaat Naalakkersuisut kissaatigaat, tamatumali peqatigisaanik aningaasat taakku amerlaqataat danskit naalagaaffiata neriorsuutigisimasai isertitatut nalunaarsornagit, tamannalu 2011-imi IST-mut 25 mio. kr.-inik sunnuteqarnerluppoq. Tamanna Aningaasaqarnermut Akileraartarnermullu Ataatsimiititaliap taamani aalajangiinermini tikkuarpaa, aatsaalli ukiup tulliani, tassa 2012-imi Naalakkersuisut danskit naalagaaffiannit aningaasaliussat tamaasa – 2011-imi 25 mio. kr.-it aammalu 2012-imi 15 mio. kr.-it – isertitatut nalunaarlugit, tamatumalu kingunerisaanik suliassamut aningaasaliissutit 65 mio. kr.-iulerlutik, naak eqqortumik 40 mio. kr.-iugaluartut.

2011-imi aningaasaliissutit allanngortinneqarnissaat april 2012-imi Naalackersuisut qinnutigaat, tamannali Aningaasaqarnermut Akileraartarnermullu Ataatsimiititaliamit itigartinneqartariaqarsimavoq, tassa aningaasanut inatsisip ukiuani aningaasaliissutit nutaat allanngukkalluunniit, aningaasanut inatsisip ukiuata pineqartup iluani iliuutsinut tunngasut, kisimik ataatsimiititaliamit akuerineqarsinnaammata. Aningaasanut inatsisip ukiua 2012 aallarnerfigalugu 25 mio. kr.-it Sanaartugassanut Iluarsagassanullu Aningaasaateqarfimmit Nunatta Karsianut utertinneqarnerannik imaqartumik ilassutitut aningaasaliissuteqarnissamik qinnuteqaammik nutaamik Naalackersuisut nassiussinnaasut Aningaasaqarnermut Akileraartarnermullu Ataatsimiititaliamit siunnersuutigineqarpoq. Taamanili Naalackersuisut qinnuteqaammik taamaattumik nassiussinissartik pissutissaqartissimangilaat.

Aatsaalli maj 2013-imi ilassutitut aningaasaliissuteqarnissamik qinnuteqaat taamaattoq, taamaattorli aningaasat ukiuannut 2013-imut atuuttusseq nassiunneqarpoq.

Suliap matuma ingerlasimanera tamaat ajornartorsiutitaqartutut isigigini aalajangiinermini ataatsimiititaliap oqaatigaa, tamatumalu saniatigut suliap taama kigaalaarutsigineqarsimanera isornartorsiorlugu, tamatumunngali pissutaaginnarpoq Naalackersuisuni aaqqissuusaaanikkut piginnaanikinneq, tamatumalu nassatarisaanik suliassat Aningaasaqarnermut Akileraartarnermullu Ataatsimiititaliamit suliareneqartussat pitsaassutsimikkut qaffassaavigineqartariaqartutut isigineqarput. Tamaaliornissarlu ataatsimiititaliamit kaammattuutigineqarpoq.

11.3 KNR-ip illutaata oqoqarnera (13-621, 13-634 aamma 13-643)

KNR-imi sulisut, oqoqarnera pissutigalugu KNR-p illutaani sulinninnissamik sullivinnik nakkutilliisoqarfimmit peqquneqarsimasut, suliffigisinnaasaannik nutaamik pilertortumik pissarsinissap pisariaqartinneqarnera tunngavigalugu KNR-imut aningaasaliissutit 2,5 mio. kr.-inik amerlineqarnissaat Aningaasaqarnermut Akileraartarnermullu Ataatsimiititaliamit ulloq 21. maj akuerineqarpoq.

Nussornermut atatillugu aningaasartuutitut takussutissiaq, KNR-ip illutaata siunissaa pillugu pilersaarut kiisalu 2013-imut Aningaasanut inatsimmi kontumut pingaarnermut 30.19.17-imut ingerlatanut takussutissiamut maannamut nikingassutaajunnartunut takussutissiaq ataatsimiititaliap aalajangiinermini qinnutigai.

Paasissutissat taakku kingusinnerpaamik ulloq 13. september 2013-imi tiguneqassasut ataatsimiititaliamit qinnutigineqarpoq. Ataatsimiititaliali qinnutaa toqqaannartumik malinneqarsimangilaq. Taarsiulluguli KNR-ip illutassaanik nutaamik misissueqqaarnissamut 1 mio. kr.-it atugassiissutigineqarnissaannik qinnuteqaat Naalackersuisut ulloq 1. juli 2013-imi nassiuppaat, tassa illutat pigineqareersut annaanneqarsinnaanngitsutut nalilerneqarmata. Qinnuteqaammut tassunga ataatsimiititaliaq ataasiakkaanik apeqquteqarpoq, tamatumalu kingorna qinnuteqaat akuerineqarpoq.

Kiisalu KNR-ip nuunneqarnissaata aammalu initanik attartukkanik atortulersuinissaq kiisalu teknikikkut atortunik nuussinissap ikkussuinissallu aningaasalersorneqarnissaat siunertaralugu KNR-imut 6,7 mio. kr.-it Naalackersuisut ulloq 19. november 2013-imi qinnutigaat. Taanna ataatsimiititaliamit aamma akuerineqarsinnaavoq.

Tamatuma saniatigut KNR-ip illutassaanik sananissaq allatulluunniit qulakkeerinissaq siunertaralugu 2014-imi aningaasanut inatsimmi katillugit 70 mio. kr.-it, 2014-imi 20 mio. kr.-inut 2015-imilu 50 mio. kr.-inut agguataarlugit, immikkoortinneqarput.

Suliassaq pillugu paasissutissat nutartikkat Naalakkersuisut isumaliutissiisummut matumunnga akissuteqaataatigut pissarsiarinissaat ataatsimiititaliamit qinnutiginerpoq.

11.4 Royal Greenland A/S-imut sullissinissamik isumaqatigiissutit (13-623, 13-638 aamma 13-652)

Nipisat suaannit tunisinissaq eqqarsaatigalugu Maniitsup eqqaa pillugu Royal Greenland A/S-imut sullissinissamik isumaqatigiissusiornissamut 585.000 kr.-inik aningaasaliissuteqarnissamik qinnuteqaat Aningaasaqarnermut Akileraartarnermullu Ataatsimiititaliamit ulloq 31. maj 2013-imi tiginerpoq. Arctic Green Foodip (AGF) akiliisinnaajunnaaqqammersoq qinnuteqaammut tunngaviuvoq. Qinnuteqaatip nassiunneqarnissaa Naalakkersuisunit 2. majimili aalajangiunneqarsimavoq, ullunilli 29-inik kinguaattoorluni taanna aatsaat apuuppoq. Tananna ataatsimiititaliamit isornartoqartinneqarpoq, tamatumalu saniatigut qinnuteqaammut naammassineqarsimangitsutut isikkoqartumut arlalinnik apeqqutissaqarluni.

Aningaasaqarnermut Akileraartarnermullu Ataatsimiititaliami amerlanerussuteqartut Siumup Atassutillu ilaasortaataasa qinnuteqaat ulloq 26. juni itigartippaat, tassa amerlanerussuteqartut isumaqaramik akuersineq aningaasat atornerareerneranni akuersinerussasoq (missingersuusiornermut inatsimmut akerliusumik), tassami piffissap taamaalinerani suaat nalaat qaangiutilereersutut oqaatigineqarsinnaammat. Tunisineq ingerlatiinnarumallugu tapiissuteqarfigineqarnissamik Royal Greenland ilumut pisariaqartitsisoq uppernarsarneqarsimangitsaq amerlanerussuteqartut aamma isumaqarput.

Aningaasaqarnermut Akileraartarnermullu Ataatsimiititaliami ikinnerussuteqartut Inuit Ataqtigiit ilaasortaataasa aalisartut tunitsivissaqaannarnissaat eqqarsaatigalugu qinnuteqaat akueriumavaat.

Amerlanerussuteqartut malillugit aalajangiisoqarpoq.

2,6 mio. kr.-it sinnilaarlugit aningaasaliissuteqarnissamik imaqartumik Sisimiut eqqaat pillugu Royal Greenland A/S-imut sullissinissamik isumaqatigiissutit akuerineqarnissaanik qinnuteqaammik nutamik Aningaasaqarnermut Akileraartarnermullu Ataatsimiititaliaq ulloq 13. august 2013-imi tigusaqarpoq. Sisimiut eqqaanni saarullinnik assartuinnermut tapiissuteqarnissaq sullissinissamik isumaqatigiissuteqarnissami siunertarineqarpoq, tassa Sisimiut Foodip tunitsivia naammattumik inissaqanngitsutut isigineqarmat.

Sullissinissamik isumaqatigiissutissatut siunnersuutigineqartoq ulloq 22. juli 2013-imit atuutilissasoq Aningaasaqarnermut Akileraartarnermullu Ataatsimiititaliamit paasineqarpoq. Aammalu Naalakkersuisut isummernissaannut tunngavissiaq ulloq 17. julimik ullulernerqarsimasoq, aatsaalli ulloq 8. august Naalakkersuisunit suliarineqarluni. Taama arriitsigisumik suliarinninneq ajornartorsiutitaqartutut ataatsimiititaliamit isigineqarpoq, taamaaliornikkummi aningaasat atornerareerneranni aningaasaliissuteqarnissaq siunniunneqarqimmat – imaluunniit minnerpaamik kingumoortumik atuutilersumik tapiissuteqartoqarniarmat.

Tamatuma kingunerisaanik ilassutitut aningaasaliissuteqarnissamik qinnuteqaatit piffissaq eqqorlugu pilertortumillu nalinginnaasumik nassiunneqartarnissaasa Naalakkersuisunut kaammattuutiginissaa ataatsimiititaliamit pisariaqartutut isigineqarpoq, taamaaliornikkut taakku siumut atuuttussanngorlugit suliarineqarsinnaaqqullugit.

Tamatuma saniatigut qinnuteqaat sullissinissamullu isumaqatigiissutissatut missingiut tamakkiisuunngitsutut ataatsimiititaliamit isigineqarput. Siunertamut pisortat tapiissuteqarnissaat pisariaqartinneqartoq qularnaatsumik nassuiaatigineqanngilaq aammalu utertilluni akiliuteqarsinnaaneq pillugu sullissinissamut isumaqatigiissummi piumasaqaatit ersernerlupput – uffa AGF-ip akiliisinnaajunnaarnerata periutsumik taamaattumik peqarnissaq pisariaqartinneqartoq takuteqqammeraa.

Tamatuma kingorna qinnuteqaat ataatsimiititaliamit isumaqatigiittumit itigartinneqarpoq.

Kiisalu Maniitsumi Sisimiunilu aaqqissuussinernut marlunnut siuliani taaneqartunut Royal Greenlandip aningaasartuutaanut matussutissatut 3,2 mio. kr.-it inulaarlugit aningaasartaqartumik qinnuteqaammik Naalakkersuisut ulloq 20. december 2013-imi nassiussipput.

Aningaasaqarnermut Akileraartarnermullu Ataatsimiititaliami amerlanerussuteqartut Siumup Atassutillu ilaasortaataasa qinnuteqaat ulloq 23. december itigartippaat, tamatumani innersuussutiginearlutik kingumut atuutilersussamik aningaasartuuteqarnissaq eqqarsaatigalugu siusinnerusukkut oqaatigineqartut.

Aningaasaqarnermut Akileraartarnermullu Ataatsimiititaliami ikinnerussuteqartut Inuit Ataqtigiit ilaasortaataasa siusinnerusukkut oqaaseqaatitik innersuussutigalugit qinnuteqaat akueriumavaat.

Amerlanerussuteqartut malillugit aalajangiisoqarpoq.

Qinnuteqaammik nukingiussassaannngitsumik siumoortumik ilimasaaruteqaqqaarani ukiup taamaalinerani taama kingusitsigisukkut nassiussineq Aningaasaqarnermut Akileraartarnermullu Ataatsimiititaliamut allatseqarfianullu pissusilersornerummat naammaginangilluinnartoq ilassutigalugu oqaatigineqassaaq. Isumaliutissiisummi uani piffimmi allami oqaatigineqareersutut Aningaasaqarnermut Akileraartarnermullu Ataatsimiititaliap 2013-imi ataatsimiinnissaa pilersaarutaasoq kingulleq piffissami nassiussiffiusumi *pereersoq* Naalakkersuisut ilisimaarereerpaat. Ataatsimiititaliap ataatsimiittarnissamut pilersaarutaa ataqqeqqullugu Naalakkersuisut Aningaasaqarnermut Akileraartarnermullu Ataatsimiititaliamit qinnuigineqarput, tamatumani Naalakkersuisut allaffeqarfiisa akornanni ataqatigiissarinerup annertunerusup pilersinneqarnissaa pisariaqarsorinarluni.

11.5 Kontomi pingaarnermi 50.01.18-imi, tunisassiorfinni ingerlatsinermut isumaqatigiissutinut tungasumi, aningaasaliissutinut tunngavigineqartut allanngortinneqarneri (13-624)

Konto pingaarneq siuliani allassimasoq pillugu Naalakkersuisut qinnuteqaammik ulloq 5. juni 2013-imi Aningaasaqarnermut Akileraartarnermullu Ataatsimiititaliamut nassiussipput. “Eqaatsunik aaqqiissuteqartarnissaq” siunertarlugu kontomut pingaarnermut aningaasaliissutinut tunngavigineqartut allanngortinneqarnissat Naalakkersuisut kissaatigigaat qinnuteqaammit paasineqarsinnaasorinarpoq, tamatumalu ilaatigut kingunerisaanik kontomit pingaarnermit

aningaasanik siunertanut maannamit amerlanerusunut aammalu Aningaasaqarnermut Akileraartarnermullu Ataatsimiititaliaq (siumoortumik) akuersiseqqaarnagu atuinissaq Naalakkersuisut kissaatigalugu. Qinnuteqaammut ilanngunneqarsimavoq missingersuutitut ilanngussaq tamatumunnga naapertuutsinniarneqarsimasoq. Missingersuutinulli ilanngussaq missingersuusiortarnermut malittarisassani 2008-meersuni minnerpaaffissatut piumasaqaatinik ersarilluinnartumik eqqutsitsinngitsoq ataatsimiititaliamit paasineqarpoq.

Kotomut pingaarnermut oqaasertaliussap Naalakkersuisunit eqqumaffiginiarneqarsimannginnerata immikkut ajornartorsiutissartaqarnera ataatsimiititaliamit aamma tikkuarneqartariaqarsimavoq, oqaasertaliussamimi allassimammat kontomi pingaarnermi aningaasanik atuinissaq pillugu isumaqatigissutit Aningaasaqarnermut Akileraartarnermullu Ataatsimiititaliamit siumoortumik akuerineqartassat. Taamaallunilu missingersuutitut ilanngussat oqaasertaannik allannguinnikkut aalajangersagaq taanna saneqqunneqarsinnaasimanngilaq (saneqqunneqarsinnaananilu). Missingersuusiortarnermut inatsimmi § 12, imm. 3 naapertorlugu missingersuutitut ilanngussat tassaapput aningaasanut inatsisissatut siunnersuummut nassuiaatit, oqaasertaliussalli § 11, imm. 3 naapertorlugu tassaallutik inatsisip oqaasertai. Inatsimmut nassuiaatit allanngornerinnaasigut inatsit soorunami allanngortinneqarsinnaanngilaq!

Tamatuma kingorna apeqqutit arlallit akissuteqarfigineqarnissaat missingersuutinullu ilanngussamik nutaamik tigusaqarnissaq siunertaralu ataatsimiititaliap suliami aalajangiinissani kinguartippaa. Tamatuma peqatigisaanik Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaatit pitsaassusiat qaffassarniarlugu ingerlaannartumik iliuuseqartoqarnissaa ataatsimiititaliamit **kaammattuutigineqarpoq**.

Qinnuteqaat iluarsisaq kiisalu missingersuutitut ilanngussaq oqaasertaliussamut naapertuuttoq Aningaasaqarnermut Akileraartarnermullu Ataatsimiititaliamit ulloq 19. juni 2013-imi tiguneqarput. Tamatuma kingorna qinnuteqaat ataatsimiititaliap akuerisinnaalerpaa.

11.6 2013-imi akuersissutitut atuisut akiliutaannik atorunnaarsitsineq (13-625 aamma 13-633)

Sinerissamut qanittumi inuussutissarsiutigalugu aalisartut akuersissutitut akiliutaasa 1. januar 2013-imit kingumut atuutilersumik atorunnaarsinneqarnissaat siunertaralugu 1,95 mio. kr.-inik aningaasartallimmik qinnuteqaat Aningaasaqarnermut Akileraartarnermullu Ataatsimiititaliamit ulloq 5. juni 2013-imi tiguneqarpoq, tassa nalunaarut akuersissutitut akileeqquisarnermi tunngavigineqartoq ullormut tassunga kingumut atuuttumik atorunnaarsinneqarnissaa Naalakkersuisut kissaatigimmassuk.

Inassuteqaatit Naalakkersuisunit akuerisat isumaat amigarpoq, taamaattumillu taakku suliap ataatsimiititaliamut nassiunneqarneranut atatillugu iluarsineqarsimasut, Aningaasaqarnermut Akileraartarnermullu Ataatsimiititaliamut nassiussinermut allakkani allassimasoq ataatsimiititaliap suliarinninnermini immikkut maluginiarpaa. Inassuteqaatit Naalakkersuisunit akuerineqartut paasiuminaalluinnarnerat iluoorluinnartoq ataatsimiititaliap nammineq misissuinnermigut paasivaa. Taamaattumik Aningaasaqarnermut Naalakkersuisoqarfiup tusarniaanermut akissuteqaataasa apeqqutiginnissaat ataatsimiititaliap pissutissaqarsoraa, tassa ataatsimiititaliamit naatsorsuutigineqarmat Naalakkersuisoqarfiup isummernissamut tunngavissiap pitsaassusaanik nalinginnaasumik qulakkeerinninnermini inassuteqaatinut paasiuminaatsunut taamaattunut uparuaasimassasoq. Tusarniaanermut akissutitut suliarineqarsimasoq tamatuma kingorna

nassiunneqarpoq, taannali *suliatut pitsaanngilluinnartutut qaasiuinnartutullu oqaatigineqartariaqarpoq*, tassami inassuteqaatini kukkunerit imaannaanngitsut Aningaasaqarnermut Akileraartarnermullu Ataatsimiititaliamit ingerlaannaq paasineqartut paasineqarsimanngimmata. Taamaattoqarnerata kingunerisariaqarpaa suliffiup iluani pitsaassutsimik Naalakkersuisoqarfiup sukannererusumik nakkutilliilerneru kiisalu Naalakkersuisoqarfimmi sulianik ilisimasaqassuseq qanoq qaffassarneqarlunilu qulakkeerneqarnissaanersoq isumaliutigineqarluni.

Tamatuma saniatigut konto pingaarneq 20.11.50, ingerlatsinerimut sillimmatinut tunngasoq, aqputigalugu aningaasalersuinissamik qinnuteqartoqarnera ajornartorsiutitaqartoq ataatsimiititaliaq isumaqarpoq, tassami aningaasaliissutinut tunngavigineqartut naapertorlugit taanna aningaasartuutinut siumut naatsorsuutigineqariinngitsunut taamaallaat atorineqartariaqarmat. Taama tunngavilersuuteqarneq ataatsimiititaliap oqartussaaffia eqqarsaatigalugu pisariaqartumik tunngavissiiinersoq ataatsimiititaliamit isumaliutigineqarluarsimasinnaagaluarpoq.

Aammattaq tamatuma saniatigut qinnuteqaatit kingumut atuuttussanngorlugit akuerineqarnissaat tunngaviusumik isigalugu kissaatigineqanngitsoq ataatsimiititaliap aammaarluni oqaatigaa.

Kiisalu inatsisinut tunngassuteqarnerusunik ataatsimiititaliaq arlalinnik isumaliutiginnippoq, tassa ataatsimiititaliamit ilaatigut isumaliutigineqarmat qinnuteqaatip inunnut allanut sunnuteqarsinnaanera (akornusiisinnaanera), soorluttaaq ataatsimiititaliamit isumaliutigineqartoq aalisarnermut inatsimmi § 14a, imm. 4-mi akiliutinik akuersissummullu akiliutinik akiliinnginnermi ernialiunneqartut pillugit aalajangersakkat allassimasut qinnuteqaammut naapertuunnertut. Tamanna pillugu qinnuteqaammi paasissutissiisoqanngilaq. Ernialersuinerli oqaatigineqareersutut aalisarnermut inatsimmi aalajangersarneqarpoq, akuersissummullu akiliutissaq nalunaarutikkut aalajangersarneqarluni. Taamaalluni nalunaarutip atorunnaarsinneqarneratigut aningaasanut siusinnerusukkut akiligassanngorsimasunut ernialiissuteqartarneq pillugu inatsisikkut piimasaqaat atorunnaanngilaq.

Tamanna tunngavigalugu ataatsimiititaliap qinnuteqaat itigartittariaqarsimavaa.

Tamatuma kingorna Naalakkersuisut qinnuteqaammik nutaamik 26. juni 2013-imi nassiussipput.

Siunertap konto pingaarneq 20.11.50, ingerlatsinerimut sillimmatinut tunngasoq, atornagu allamit aningaasalerneqarnissaa qinnuteqaammi nutaami siunnersuutigineqarpoq. Tamatuma saniatigut Aningaasaqarnermut Akileraartarnermullu Ataatsimiititaliap siusinnerusukkut oqaaseqaatai qinnuteqaammi annertunerusumik isummerfigineqanngillat, tamannalu ataatsimiititaliamit "*assut naammagineqanngilaq, tassami missingersuusiornermut inatsimmi § 28, imm. 4-mi erseqqilluinnartumik allassimammatt paasissutissat attuumassuteqartut tamarmik qinnuteqaammut ilanngunneqassasut*". Suliarli pillugu paasissutissanik ilassutaasunik ataatsimiititaliaq immikkut pissarsisinneqarpoq.

Tamatuma saniatigut akuersissutinut akilerneqanngitsunut erniat pillugit apeqqummut atatillugu ataatsimiititaliap paasivaa Inatsisartunut qinersinissamik nalunaaruteqartoqarnera pissutigalugu piffissap akiliiffissap kingorna akuersissutinut akilerneqanngitsunut ernialiussat naatsorsornissaat Naalakkersuisut allaffissornikkut suliarisimanngikkaat. Tamanna **kanngunarluinnartutut** aammalu Kalaallit Nunaanni Namminersorlutik Oqartussani pisortat ingerlatsinerannut tatiginarsaataanngilluinnartutut oqaatigineqartariaqarpoq. Piffissami aggersumi naalakkersuinikkut

nikittoqarnissaanik naatsorsuutigisat annertunerusumik annikinnerusumilluunniit piviusorsiorlut aallaavigalugit inatsimmi Inatsisartunit akuerineqartumi malinneqartussaataasumilu aalajangersakkanik ingerlatsinnginnissamik aqutsisoqarfiup nammineerluni aalajangenera inatsisitigut suliatigullu mianerisassanik avaqqutsinerulluinnarpoq. Isumaliutit taamaattut inuiaqatigiinni inatsisit malillugit ingerlasuni naleqqutinnigillat. Inuiaqatigiinni inatsisit malillugit ingerlasuni inatsit politikimit salliuvoq! Ernianut akileeqqusineq aalisarnermut inatsit malillugu tamatuma kingorna atuutsinneqalernerarlugu Naalakkersuisut tamatuma kingorna paasissutissiissuteqarnerisa taama isiginninneq allanngortinngilaa.

Tamanna tunngavigalugu suliaq sukumiisumik misissoqqullugu Kukkunersiunermt Ataatsimiititaliaq Aningaasaqarnermt Akileraartarnermullu Ataatsimiititaliamit qinnuigaa, tamannalu nunatta karsiata 2013-imi naatsorsuutaanik Kukkunersiunermt Ataatsimiititaliaq suliarinninneranut atatillugu pisussatut naatsorsuutigineqarpoq.

Tamatuma saniatigut aalisarsinnaanermut akuersissutinik akiliuteqartitsisalerneup aalisarsinnaanermut akuersissutit amerlassusiannut sunniuteqarsimanngitsoq Naalakkersuisut ataatsimiititaliamut allakkaminni paasissutissiissutigaat.

Tamanna tunngavigalugu Aningaasaqarnermt Akileraartarnermullu Ataatsimiititaliami amerlanerussuteqartut Siumup Atassutillu ilaasortaataasa qinnuteqaat akueraat. Tamatumani innersuussutigineqarluni ingerlatsinikkut iluaqutissarsiffiusussaanera aammalu ”pissutsit akuerineqarsinnaanngitsut iluarsineqarmata”.

Aningaasaqarnermt Akileraartarnermullu Ataatsimiititaliami ikinnerussuteqartut Inuit Ataqtigiit qinnuteqaat kingumut atuutilersumik sunniuteqartussa q akuerisinnaanngilaat erseqqissaatigalugulu inatsisit siumut isigisumik allanngortinneqarnissartik atorunnaarsinneqarnissartilluunniit tikillugu atuummata.

Amerlanerussuteqartut naapertorlugit aalajangiisoqarpoq.

11.7 Inatsisilerinermut tunngasunik allaffissornerup nukittorsarneqarnera (13-627)

Konto pingarneq 30.01.01-imut, Ilaqutariinnermt Inatsisinillu Atuutitsinermut Naalakkersuisoqarfimmmt tunngasumut, aningaasaliissutit amerlineqarnissaannik qinnuteqaat Aningaasaqarnermt Akileraartarnermullu Ataatsimiititaliamit ulloq 20. Juni 2013-imi tiguneqarpoq. Aningaasaliissutit 2013-imi 300.00 kr.-inik ukiunilu missingersuusiorfusuni (tamani?) 1 mio. kr.-inik amerlineqarnissaat kissaatigineqarpoq.

Missingersuusiornermulli inatsimmi § 28, imm. 3 imatut oqaasertaqarpoq; *“Nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut ukiup aningaasanut inatsisip atuuffiata ingerlanerani aningaasartuuteqarnikkut sunniuteqartussanut tunngasuusassapput”*.

Taamaalillunilu ukiuni missingersuusiorfinni aningaasaliissutit amerlineqarnissaannik akuersinissaminut ataatsimiititaliaq inatsisitigut tunngavissaqanngilaq.

Tamanna tunngavigalugu Aningaasaqarnermt Naalakkersuisoqarfiup tusarniaanermut akissuteqaataata assilineqarneranik pissarsisinneqarnissani Aningaasaqarnermt

Akilerartarnermullu Ataatsimiititaliap qinnutigaa, tassa ataatsimiititaliamit naammagineqanngimmat missingersuusiortarnermik inatsimmik taamatut ilisimasaqanngissuseq siusinnerusukkut paasineqarsimannngimmat. Tusarniaanermulli akissut taanna tiguneqarsimannngilaq. Tamatuma kinguneranik ataatsimiititaliamit ilimagineqarpoq tusarniaanermut akissut taanna ilutsimigut imarisamigullu suliat 13-625 aamma 13-633 siulianiittut ataanni oqaatigineqartunit allaanerungaarsimannngitsoq.

Tamanna tunngavigalugu qinnuteqaat ataatsimiititaliamit itigartinneqarpoq.

11.8 Nanortalimmi atuartut angerlarsimaffianni kantiinamut atugassanngortitsineq (103-632)

Nanortalimmi atuartut angerlarsimaffiannik nutaamik pilersitsinissamut aningaasaliissutit 7,44 mio. kr.-inik amerlineqarnissaat, taamaalillunilu sanaartornissamut katillugit 25.744 mio. kr.-it immikkoortinneqarnissaat, Naalakkersuisut ulloq 24. juni 2013-imi qinnutigaat.

Aningaasaqarnermut Akilerartarnermullu Ataatsimiititaliap aalajangiinnermini suliap ingerlasimanerata uparuarnissaa pissutissaqarsoraa, tassa ataatsimiititaliap isumaqarmat aningaasaliissuteqarnissamik siusinnerusukkut suliami tunngavissat Aningaasaqarnermut Akilerartarnermullu Ataatsimiititaliamit akuerineqartut aallaavigalugit missingersuusiortoqarsimannngitsoq.

Taamaalillunilu ataatsimiititaliap ima allappoq:

”Suliassamut siunnersuummik nutaamik suliassat allaaserineqarnerannut allannguutaasussamik suliartoqarnera Naalakkersuisut 2011-mi qinnuteqaamminni ataatsimiititaliamut ilisimatitsissuteqarsimannngimmata Aningaasaqarnermut Ataatsimiititaliamit isornartoqartinneqarpoq. Suliaq (01.31.06/11-00551) ataatsimiititaliap ulloq 7. sept. 2011-mi ataatsimiinnerani sularineqarpoq aammalu qinnuteqaammi matumani allassinalluni missingersuutit B-t nutaat ulloq 8. sept. 2011-mi sularineqartut – tassa imaappoq suliassamut atugassanngortitsinissamut ataatsimiititaliap akuersissuteqaqaarnerata aqaguani.

Suliassamut siunnersuutip nutaap missingersuutit B-nik ilallip suliassaq 40 %-ingajannik akisunerulersippaa. Naak missingersuutit B-t nutaat aningaasaliissutit sipporneqarnerannik suli kinguneqanngikkaluartut piffissap taamaanneranili allanngortinneqarsimasinnaanngillat, tamannalu pillugu Aningaasaqarnermut Ataatsimiititaliap ilisimatinneqartussaasimagaluarluni. Taamaalillutik tunngavissarititaasunit Aningaasaqarnermut Ataatsimiititaliamit tunniunneqartunit allanik tunngavissaqarlutik Naalakkersuisut aningaasaliissutit atugassanngortissimavaat. Missingersuusiortarnermut maleruaqqusani 2008-meersuni imm. 4.3 naapertorlugu tamanna annertuumik ajornartorsiutitaqarpoq.

Naalakkersuisut suliassanik aqutsinermik suliassanillu siulersuineramik pitsaanerungaartumik siunissami qulakkeereqqusarlugit ataatsimiititaliap sakkortunerpaamik qinnuigissavai. Aammattaaq ilassutitut aningaasaliissuteqarnissamik qinnuteqaatinik Aningaasaqarnermut Ataatsimiititaliamut nassitsisarnerminni missingersuusiortarnermut maleruaqqusat 2008-meersut malittaqqullugit Naalakkersuisut qinnuigineqarput.”

Tamanna tunngavigalugu eqqarsarnartoqartitsilaarluni ataatsimiititaliap qinnuteqaat akueraa.

11.9 PAT-imut aningaasaliissutinit napparsimasut qarasaasiaq atorlugu nalunaarsorneqartalernissaannik suliniummut missingersuutitut sunniuteqanngitsumik nuussineq (13-640)

Peqqinnissaqarfimmi aningaasaqarnikkut pissutsit pillugit ilisimatitsissummik ulloq 19. september 2013-imi AAA tigusaqarpoq. Suliassaqarfimmi 34-mi kontot pingaarnerit arlallit atuineruffiusinnaanerit aarlerinaateqartoq ilisimatitsissummi allassimavoq. Taakkununga ilaalluni konto pingaarneq 34.12.03, ataatsimut aningaasartuutitut, napparsimasunik angallassinernut il.il. tunngasoq, allamik susoqanngippat 10 mio. kr.-inik atuineruffioratarsinnaasutut isigineqartoq. Ilisimatitsissut ataatsimiititaliap arlalinnik uparuateqarnissaanut tunngavissiivoq, tamannalu iluatsillugu Naalakkersuisut suliassaqarfimmi missingersuutitut aqutsinerata nukittorsarneqarnissaa pisariaqartoq ataatsimiititaliamit erseqqissaatigineqarpoq.

Aammattaaq napparsimasut qarasaasiaq atorlugu nalunaarsorneqartalernissaannik suliniutip ingerlateqqinneqarnissaanut kontot pingaarnerit arlallit akornanni aningaasanik nuussinissamik qinnuteqaat ulloq 19. september 2013-imi ataatsimiititaliamit tiguneqarpoq. Qinnuteqaammi tassani allassimavoq kontomit pingaarnemit 34.12.03-mit, ataatsimut aningaasartuutitut, napparsimasunik angallassinernut il.il. tunngasumit, 4,5 mio. kr.-it nuunneqarnissaat Naalakkersuisut ilaatigut kissaatigigaat, tassa konto pingaarneq 10 mio. kr.-inik atuineruffioratarsinnaasutut ataatsimiititaliamit paasineqaaqqammersoq.

Tamanna tunngavigalugu Naalakkersuisunit nassuiaammik pissarsiniarnissamut ataatsimiititaliap pissutissaqarsoraq, tamannalu 4. oktober 2013-imi aalajangikkamigut ataatsimiititaliap nalunaarutigaa.

Allakkaminut marlunnut akissutitut ataatsimut allakkat 7. november 2013-imeersut ataatsimiititaliap tiguai. 2014-imi aningaasanut inatsisissatut siunnersuummik siunnersuutitillu allanik ataatsimiititaliami suliarineqartussatut innersuunneqartunik ulapputeqarneq pissutigalugu ulloq 4. december 2013-imi ataatsimiinnermini ataatsimiititaliap akissuteqaat aatsaat suliarisinnaasimavaa.

Naak tamanna ataatsimiititaliap apeqqutaanut akissutaasutut isigineqanngikkaluartoq, tamanna tusaatissatut tiguneqassasoq ataatsimiititaliamit ataatsimiinnermi tassani aalajangiunneqarpoq, tassa siunertaq matumani pineqartoq ilanngullugu Naalakkersuisut ulloq 3. december aningaasaliissuteqarnissamik qinnuteqaammik nutaamik nassiussimmata. Aningaasaliissuteqarnissamik qinnuteqaammi nutaami 4,5 mio. kr.-it taakku kontomit pingaarnermit 34.12.02-mit, Nunatsinni Peqqinnissakkut Ilinniartitaanikkullu suliniutitut tunngasumit, aningaasanik atorneqarsinnaasunik peqartutut Naalakkersuisunit paasissutissiissutigineqartumit nuunneqarnissaat kissaatigineqarpoq.

Aningaasaliissuteqarnissamik qinnuteqaat nutaaq taanna ataatsimiititaliamit ulloq 19. december 2013-imi akuereqarpoq.

11.10 Nuna tamakkerlugu innarluutilinnut piginnaanngorsarfik nutaaq (13-642)

Meeqqanut inersimasunullu innarluutilinnut nuna tamakkerlugu piginnaanngorsarfirmik Nuummi pilersitsinissamut 2013-imi aningaasanut inatsimmi kontomi pingaarnermi 83.30.13-imi 6,8 mio. kr.-it imikkoortinneqarput.

Innarluutilinnut nuna tamakkerlugu piginnaanngorsarfimmik Sisimiuni pilersitsinissaq siunertaralugu aningaasat taakku aammalu sanaartornermut suliassamut nutaamut aningaasat siusinnerusukkut immikkoortinneqartut nuunneqarnissaat Naalakkersuisut suliame matumani qinnutigaat. Suliniummut aningaasartuutit tamarmiusut qinnuteqaat malillugu 39,5 mio. kr.-inut missingerneqarput.

Pisortat sanaartornermut aningaasaliissutaasa nunamut tamarmut siammarneqarnissaannik kissaat aallaavigalugu piginnaanngorsarfik Sisimiuni inissinneqassasoq kissaatigineqartoq qinnuteqaammi allassimavoq.

Tamatuma uparuarnissaa aalajangiinermini Aningaasaqarnermut Ataatsimiititaliap tunngavissaqartippaa, tassa aningaasaliinerit nuna tamakkerlugu siammartinneqarnissaannik kissaat pinnagu suliameulli tunngasut eqqarsaatigineqartariaqartut ataatsimiititaliamit **kaammattuutigineqarmat.**

Taama oqaaseqarluni qinnuteqaat ulloq 29. november 2013-imi akuerineqarpoq.

Aningaasaqarnermut Ataatsimiititaliap taamani oqaaseqaataanut ilassutitut ilanngullugu oqaatigineqarsinnaavoq sanaartornermi suliassamut nutaamut aningaasaliissutit ukiup taamaalinerani taama kingusitsigisukkut 11,5 mio. kr.-inik qinnuteqartoqarneratigut amerlineqarnerat Aningaasaqarnermut Akileraartarnermullu Ataatsimiititaliap siusinnerusukkut kaammattuutaanut naapertuuttut isigineqarsinnaanngimmat. Aningaasat taakku kingusinnerusukkut atugassatut Sanaartugassanut Iluarsagassanullu Aningaasaateqarfimmut atornerqaratik iliinnarneqarnissaat ajoraluartumik ilimanartutut isigineqartariaqarpoq. Tamanna tunngavigalugu sanaartornermut aningaasaliissutinik piviusorsioortumik ukioq manna aamma atugassisarnissamik kaammattuutini ataatsimiititaliap aammaarluni uteqqippaa.

11.11 Konto pingaarnermut 10.13.11-mut, Aktiaateqarluni ingerlatseqatigiiffinnut aningaasanngorlugit aningaasartuutinut tunngasumut, ilassutitut aningaasaliissuteqarnissaq (13-644)

Konto pingaarnermut suliani allassimasumut oqaasertaliussaq nutaaq Aningaasaqarnermut Akileraartarnermullu Ataatsimiititaliamit suliame matumani akuerineqarpoq. Aktiaateqarluni ingerlatseqatigiiffimmik, containerersortunut Nuummi umiarsualivimmik nutaamik pilersitsinissamik ingerlatsinissamillu siunertaqartumik, pilersitsinissamut atatillugu Naalakkersuisut piginnaatinneqarput aningaasanik tigoriaannarnik 25 mio. kr.-inik aammalu 110 mio. kr.-inik akisussaaffiliisumik taarsigassarsiatut aningaasaliinissamut kiisalu Nuummi umiarsualiviup pioreersup nalilittut aningaasaliissutiginissaanut.

Oqaasertaliussaq aalajangiiffigisassatut siunnersuutip UKA 2013/18-ip Inatsisartunit akuerineqarnerata kinguneraa, taannalu innersuussutigineqarpoq.

Namminersorlutik Oqartussat aktiaateqarlunilu ingerlatseqatigiiffissap akornanni taarsigassarsianut uppernarsaat inaarutaasoq atsiorneqareeriparpat kalaallisut danskisullu nassiateqqullugu Aningaasaqarnermut Akileraartarnermullu Ataatsimiititaliap aalajangiinerani ataatsimiititaliamit qinnutigineqarpoq. Taarsigassarsianullu uppernarsaat taanna tiguneqarsimanngilaq.

Taamaattumik taassuma piaartumik nassiunneqarnissaa ataatsimiititaliamit **qinnutigineqarpoq.** Uppernasaat pigineqassanngikkaluarpat itisiliissutaasumik nassuiaasoqarnissaa qinnutigineqarpoq.

11.12 Knud Rasmussenip Højskoliata Sisimiuni illuutaasa Namminersorlutik Oqartussanut tunniunneqarnissaat aammalu højskolip akiitsuusa nalikilliliivigineqarnissaat (13-647)

2. december 2013-imi allagaqarlutik siuliani allassimasut pillugit qinnuteqaammik Naalakkersuisut nassiussipput. Qinnuteqaat IST-mut 8,166 mio. kr.-inik sunniuteqarnerlussaaq.

Missingersuusiortarnermut inatsimmi § 28-mut taassumalu ataani aalajangersakkanut naapertuutinnginnini pissutigalugu qinnuteqaat ataatsimiititaliamit itigartinneqarmat aammalu ataatsimiititaliap aalajangiinera isummersuutinik tunngaviusunik pingaarutilinnillu imaqarmat tamakkerlugu issuarneqassaaq:

“Knud Rasmussenip Højskoliata illuutaasa tiguneqarnissaat, højskolip Namminersorlutik Oqartussanut akiitsuusa nalikilliliivigineqarnissaat kiisalu illutat tiguneqartut højskolimit akiliutitaqanngitsumik atorineqarsinnaanissaat Naalakkersuisut qinnuteqaat.

Ataatsimiititaliap tassunga atatillugu oqaatigissavaa missingersuusiortarnermut inatsimmi § 28-mi allassimamat aningaasaliissutit allannortinneqarnissaannik qinnuteqaatit taamaallaat annertuumik atugassiinernut attuumassuteqartariaqartut aammalu aningaasanut inatsisip suliarineqarnerani siumut naatsorsuutigereerneqarsinnaasimassanngitsut. Inatsimmut nassuiaatini erseqqissaatigineqarpoq aningaasaliissutit allannortinneqarnissaannik pisariaqartitsineq ”tassanngaannartumik” pinngorsimasariaqartoq. Aammattaaq allassimavoq kissaatit ukiup tullissaani aningaasanut inatsimmut utaqqissunneqarsinnaasut Aningaasaqarnermut Akileraartarnermullu Ataatsimiititaliamut qinnuteqarnermik kinguneqartariaqanngitsut. Kiisalu allassimalluni qinnuteqaatip aningaasaqarnikkut toqqaannartumik toqqaannanngitsumillu kingunerisassai tamarmik ataatsimiititaliamut qinnuteqaammi nassuiaatigineqassasut, tamatumani ukiup tulliani sunniutaasinnaasut aamma nassuiarneqassallutik.

Højskolip aningaasaqarnikkut inissisimanagera illutallu iluarsarneqarnissamik pisariaqartitsiviunerat siumut naatsorsuutigereerneqarsinnaanngitsutut oqaatigineqarsinnaanngillat, taamaattumillu qinnuteqaatip nassiunneqartup akuerineqarnissaanut suliami matumani tunngaviusinnaasumik suliami matumani peqanngitsoq ataatsimiititaliaq isumaqarpoq. Tamatumunnga taarsiullugu suliaq aningaasanut inatsisissap tulliuuttup suliarineqarnerani ilaatinneqartariaqartoq ataatsimiititaliaq isumaqarpoq. Aammattaaq ukiuni missingersuusiortarfusuni aningaasaqarnikkut kingunerisassat (erniatigut annaasassat) nassuiaatigineqartariaqartut ataatsimiititaliaq isumaqarpoq, soorluttaaq taamatut aallartitsinnginnermi suliffeqarfiit namminersortut Namminersorlutik Oqartussat illuutaannik akiliinertaqanngitsumik atuisinnerinut inatsisitigut tunngavissamik ersarissumik erseqqissaateqartoqartariaqartoq ataatsimiititaliaq isumaqarpoq.”

Siuliani allassimasunut ilanngullugu oqaatigineqarsinnaavoq Namminersorlutik Oqartussat illuutaannik suliffeqarfiit namminersortut akiliuteqanngitsumik atuisinnaanerannut tunngavissamik ataatsimiititaliap ilisimasai naapertorlugit suli pilersitsisoqanngilaq. Tunngavissaq taamaattoq – pisariaqarfiatigut – piaartumik suliarineqartariaqarpoq.

Taamatut tunngavissaqanngitsillugu suliffeqarfiit namminersortut pisortat illuutaanni akiliutitaqanngitsumik atuisinneqarnerat akisussaassuseqartumik aningaasaqarnikkut suliutigullu pisortat aqutsineranni tunngaviusunut ataatsimut isigalugu naapertuutinngitsoq oqaatigineqartariaqarpoq.

11.13 Kontoni pingaarnerni 10.01.01-imi, Naalakkersuisut siulittaasuata Naalakkersuisoqarfianut tunngasumi, aamma 10.10.10-mi, Naalakkersuisunut tunngasumi, atuinersuteqarnerup kingunerisaanik ilassutitut aningaasaliissuteqarneq (13-649)

Sulisunut soraartunut immikkut ittumik aningaasartuutitut matussutissat katillugit 1 mio. kr.-inik ilassutitut aningaasaliissuteqarnissaq suliama matumani Naalakkersuisut ulloq 29. november 2013-imi qinnutigaat, tamannalu ataatsimiititaliamit akuerineqarsinnaavoq, tamatumani paasissutissat erseqqinnerusut kissaatigineqarlutik. Pissutsit makku tunngavigalugit aningaasartuutaasunut matussutissat qinnuteqaammi immikkut pineqartut qinnuteqaammi akissummilu allassimavoq:

- Inatsilerinermi pisortaasimasup akissarsiai soraarsinneqarneranilu ajunngitsorsiasat: 1,2 mio. kr.
- Naalakkersuisoqarfiup pisortarisimasuata aningaasarsiai: 1,5 mio. kr.
- Sulisut Naalakkersuisuusimasunut attuumassuteqartut pingasut akissarsiaat soraarsinneqarnerannilu ajunngitsorsiasat: katillugit 1,1 mio. kr.
- Inatsilerinermi pisortap atorfeqarneranik aammalu tusagassiornermut ataqatigiissaarisumik atorfinitsitsinermit eqqartuussissuserisup misissuineranut aningaasartuutit: 0,3 mio. kr.
- Naalakkersuisunut ilaasortanut amerlanernut nutaanullu aammalu Naalakkersuisunut ilaasortaasimasut ilaasortaajunnaarnersiaannut aningaasartuutit: Aningaasat amerlassusiat paasissutissiissutigineqanngilaq.

Pissutsit immikkut ittut taakku ataatsimut isigalugu paasissutissiissutigineqartut malillugit 4,1 mio. kr.-it missaannik aningaasartuuteqarnerunermik kinguneqarput, taakkunani 3 mio. kr.-it aningaasaliissutit pioreersut iluini matussuserneqarsimagunarlutik.

Aningaasartuutit taama amerlatigisut pingaarutilimmik tunngavissaqarani pitsaasumillu pissarsivunngitsumik nunatta karsianut akilertinneqartariaqarsimanerat tunngaviusumik isigalugu ernumanarluinnartut naapertuutinnngitsutullu Aningaasaqarnermut Akileraartarnermullu Ataatsimiititaliamit isigineqarpoq. Nunatta karsia siunissami pisariaqanngitsumik taamatut aningaasartuuteqartariaqalersinneqassappat ataatsimiititaliamit akueriuminaatsinneqassaaq.

Aningaasaqarnermut Akileraartarnermullu Ataatsimiititaliap paasinninnera malillugu apeqqut taanna – ataatsimiititaliap aalajangiinerani allassimasutut – nunatta karsiata 2013-imut naatsorsuutai pillugit Kukkuersiunermit Ataatsimiititaliap isumaliutissiissummini ilanngutilersaarpa, taamaattumillu suliaq pillugu Aningaasaqarnermut Akileraartarnermullu Ataatsimiititaliap maannakkuugallartoq iliuuseqaqqissanani.

11.14 Peqqinnissaqarfimmu 15 mio. kr.-inik ilassutitut aningaasaliissuteqarneq (13-651)

Peqqinnissaqarfimmu aningaasaliissutinik qaffaanerit arlallit Aningaasaqarnermut Akileraartarnermullu Ataatsimiititaliamit ulloq 20. december 2013-imi akuerineqarput. Aningaasaliissutinik qaffaanerit taakku oqaasertaliussanik tunngaveqarluni Naalakkersuisut 2013-imi novemberimi decemberimilu arlalinnik nuussinerinut tapertaapput.

Peqqinnissaqarfimmu aningaasanik ikigisassaannngilluinnartunik ukiup naalernerani nuussisoqarnissaa pisariaqartoq aammaarluni paasinarsimmat Aningaasaqarnermut Ataatsimiititaliap aalajangiinermini assut ajuusaarnartut isigaa. Saqqummiunneqartut

annertutigisumik ilassutitut aningaasaliissuteqarnissamik qinnuteqaatinut naammangitsumik missingersuusiorsimaneq ilaatigut pissutaasimassasoq ataatsimiititaliaq isumaqarpoq.

Tamatuma kingorna qinnuteqaat ataatsimiititaliamit akuerineqartariaqarsimavoq, tamatumanilu Kukkunersiuiinermut Ataatsimiititaliaq ilisimatinneqarpoq. Tamatuma kingorna peqqinnissaqarfimmi missingersuusiortarneq pillugu apeqquut 2013-imut nunatta karsiata naatsorsuutai pillugit isumaliutissiisummini Kukkunersiuiinermut Ataatsimiititaliap ilanngutissagaa naatsorsuutigineqarpoq. Tamanna pillugu siusinnerusukkut aningaasanut inatsisiusarsimasut pillugit isumaliutissiisutini taakkunanilu peqqinnissaqarfik pillugu allassimasut Aningaasaqarnermut Ataatsimiititaliap innersuussutigai.

12. Aningaasaqarnermut Ataatsimiititaliap kaammattuutai

2013-mi ilassutitut aningaasaliissutitut inatsisissatut siunnersuummik kiisalu Naalakkersuisut aningaasaliissutitut allannguutissatut siunnersuutaannik suliarinninnermini taakkunanngalu malitseqartitsisarnermit misilittakkani tunngavigalugit Naalakkersuisunut **kaammattuutinik** arlalinnik ukuninnga saqqummiussinissaminut Aningaasaqarnermut Akileraartarnermullu Ataatsimiititaliaq pissutissaqarsorivoq:

Kaammattuut nr. 1

Missingersuutinik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisit atuuffiata naalernerani nuussinerit ingerlanneqartanninnissaannik Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput**. Taamaattoqartillugu aningaasaliissutinik nuussisinnaatitaanerminnik Naalakkersuisut atuinngitsoorluarsinnaapput, tassungalugu taarsiullugu nuussinissamik qinnuteqaammik Aningaasaqarnermut Akileraartarnermullu Ataatsimiititaliamut saqqummiussillutik. Tassunga taarsiullugu missingersuutinik qaangiinermut pissutaasoq nunatta karsiata naatsorsuutaanut atatillugu naatsorsuutinut nassuiaatini ersarissarneqarsinnaavoq.

Kaammattuut nr. 2

Aningaasat Sanaartugassanut Iluarsagassanullu Aningaasaateqarfimmi atorneqaratik uninngaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutinik atuinissamik **piviusorsiorturnik** missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Akileraartarnermullu Ataatsimiititaliamit **kaammattuutigineqarpoq**.

Kaammattuut nr. 3

Missingersuutinut ilanngussat, pitsaassusissaat, qinnuteqaatinut atatillugu atortussat kiisalu (ilaatigut) Aningaasaqarnermut Naalakkersuisoqarfiup tusarniarneqartarnera pillugu piumasaqaatit pisortatigoortut qulakkeerneqarnissaat eqqarsaatigalugit Aningaasaqarnermut Akileraartarnermullu Ataatsimiititaliamut aningaasaliissuteqarnissamik qinnuteqaatit pitsaassusiisa qaffassarneqarnissaat siunertarlugu 2008-mi missingersuusiortarnermut malittarisassani aalajangersakkat Naalakkersuisunit malinneqarnissaat Aningaasaqarnermut Akileraartarnermullu Ataatsimiititaliamit **kaammattuutigineqarpoq**.

Kaammattuut nr. 4

Kaammattuut nr. 4

Missingersuutit pillugit Inatsisartunut akuttunngitsumik ilisimatitsissutinik nassiussisarnerit Naalakkersuisut piaartumik ingerlateqqilissagaat Aningaasaqarnermut Akileraartarnermullu Ataatsimiititaliamit **kaammattuutigineqarpoq.**

Kaammattuut nr. 5

Inatsisartunut qinersinissamik nalunaaruteqartoqarsimatillugu Aningaasaqarnermut Akileraartarnermullu Ataatsimiititaliap oqartussaaffia pillugu inatsisitigut aalajangersakkat tunngavissallu immikkut ittut allatseqarfimminnut erseqqissaatigeqqullugit Naalakkersuisut Aningaasaqarnermut Ataatsimiititaliamit **kaammattorneqarput,** taamaalilluni Inatsisartunut tullianik qinersinissamik nalunaaruteqartoqarnerata kingorna qinnuteqaatit ersarilluinnartumik unioqqutitsisut Aningaasaqarnermut Akileraartarnermullu Ataatsimiititaliamut saqqummiunneqaqqunagit.

Kaammattuut nr. 6

Ilaatigut sullissinissamik isumaqatigiissutit aqputigalugit tapiissuteqartarneq pillugu ilassutitut aningaasaliissuteqarnissamik qinnuteqaatinik piffissaq eqqorlugu pilertortumillu nassiussisarnissaq nalinginnaasumik qulakkeerinniffeqqullugu Naalakkersuisut Aningaasaqarnermut Akileraartarnermullu Ataatsimiititaliamit **kaammattorneqarput,** taamaalilluni qinnuteqaatit taamaattut siumut sunniuteqartussanngorlugit akuerineqarsinnaaqqullugit. Qinnuteqaatit kingumut atuuttussamik sunniuteqartussat akuerinissaat ataatsimiititaliamit kissaatigineqanngilaq.


Kaammattuut nr. 7

Sanaartornermut aningaasaliinerit nunamut tamarmut siammarterneqarnissaannik kissaateqartoqarnera kisiat allaaviginagu inuilli atuisussat sullinneqarnissaat pingaarnertut eqqarsaatigalugu isumaginninnerup iluani pisortat suliffeqarfiutaannik sanaartorneq ingerlanneqartassasoq Aningaasaqarnermut Akileraartarnermullu Ataatsimiititaliamit **kaammattuutigineqarpoq.** Tassunga ilanngullugu pingaartumik inuit sanngiitsut ikiorneqarnissaannut isumassorneqarnissaannullu sulisussanik ilinniarsimasunik sulisussarsinissamut pisariaqartitsineq aamma mianeriniarneqartariaqarpoq.


13. Aningaasaqarnermut Akileraartarnermullu Ataatsimiititaliap inassuteqaatai

Paasininneq isumaliutissiisummi allaqqasoq aammalu nangaassutit naatsorsuutigisallu isumaliutissiisummi taaneqartut naapertorlugit inatsisissatut siunnersuut akuersissutigineqassasoq Aningaasaqarnermut Akileraartarnermullu Ataatsimiititaliap isumaqatigiittup inassutigaa.


Taama oqaaseqarluni Inatsisartut Aningaasaqarnermut Akileraartarnermullu Ataatsimiititaliaata Inatsisartut 2013-mi ilassutitut aningaasaliissutitut inatsisissaattut siunnersuut aappassaaniigassanngortippaa.



Jens Imanuelsen,
siulittaasoq




Gerhardt Petersen




Per Berthelsen


Hans Aronsen



(KARL-KRISTIAN KAUSE)
Evelyn Frederiksen



Kaupik V. Kleist



Naaja Nathanielsen